


3

44.204
7772
=3



居士集卷第五 全集五

古詩一十八首

答原父 一作答劉廷評

炎歊鬱然蒸，夕景織方酸。子來清風興，蕭蕭吹几簾。又如沃瓊

漿，遽飲不知厭。嗟予學苦晚，白首困鉛槧。危疑奚 一作何 所質，孔

孟久已寔。羣儒窒自私，惟子通且瞻。幸時丐羸餘，屢得飽饑歉。

巖巖 一作落落 春秋經大法，誰敢說 一本有譬猶天之蒼 三才失綱

紀 一作綱 五代極昏墊，盜竊恣恠 一作發 篋英雄爭奮劍，興亡兩倉

卒事迹多遺欠 一作 纔能紀成敗，豈暇誅姦僭。聞見患孤寡 一作



十七世孫衡校刊



陋是非誰證驗嘗欣同好惡遂乞指瑕玷反蒙華衮褒如譽嫫
母豔救非當在早已暴一作暴惡何由斂苟能哀癘痼其可惜針砭
風船或許邀湖綠方濫灩

蟲鳴

葉落秋水冷眾鳥聲已停陰氣入墻壁百蟲皆夜鳴蟲鳴催歲
寒唧唧機杼聲時節忽已換壯心空自驚平明起照鏡但畏白
髮生

奉答子華學士

一作答 韓絳

安撫江南見寄之作

一本無 下四字

百姓病已久一言難遽陳良醫將治之必究病所因天下久無
事人情貴因循優游以為高一作政寬縱以為仁今日廢其小皆

謂不足論明日壞其大又云力難振旁窺各陰拱當職自逡巡
歲月侵襲頽紀綱遂紛紜坦坦萬里疆蚩蚩九州民昔而安且
富今也迫以貧疾小不加理浸淫將徧身湯劑乃常藥未能去
深根鍼艾有奇功暫痛勿吟呻痛定支體胖乃知鍼艾神猛寬
相濟理古語六經存蠹弊革僥倖濫官絕貪昏牧羊而去狼未
為不仁人俊又沈下位惡去善乃伸賢愚各得職不治未之聞
此說乃其要易知行每艱遲疑與果決利害反掌間捨此欲有
為吾知力徒煩家至與戶到飽饑而衣寒三王所不能豈特今
所一作獨 今為難我昔忝諫列日常趨紫宸聖君堯舜心閔閔極憂
勤子華當來時玉音耳嘗親上副明主意下寬斯人屯江南彼

一方巨細到可詢一作論諭以上恩德當冬反陽春吾言乃其概

豈一作非止一方云

送張洞推官赴永興經略司

一本云送張推官掌機宜

自古天下事及時難必成爲謀於未然聰者或莫聽患至而後
圖智者有不能未遠前日悔可爲來者銘熙熙彼西人老死織
與耕狂羝一作氏一朝叛烽火四面驚用兵五六年首惡竟逃刑
仰賴天子聖乾坤量包并苗頑不率德舜羽舞于庭謂此雖異
類有生亦含情藩籬被觸突譬若豨與羝馴擾以芻豢可呼隨
指令稱藩效臣職冠帶復人形四海得休息瘡痍肉新生敢問
前孰失恃安而弛兵酒肴爲善將循默乃名卿慮患謂生事高

談笑難行一方兵遽起愚智共營營上煩天子仁盱食憂吾氓
謀議及臺阜幽棲訪巖扃小利不足爲涓流助滄溟大功難速
就倉卒始改更徒自益紛擾何由集功名乃知深遠畫施設在
安平今也實其時鑑前豈非明嚴嚴經略府尊俎集豪英千營
飽而嬉萬馬牧在坰相公黃閣老與國爲長城張子美而秀文
章博羣經從軍古云樂知己士所榮感激報恩義當來請長纓

寄聖俞

一作因馬察院至云見聖俞於城東輒書長韻奉寄

凌晨有客至自西爲問詩老來何稽京師車馬曜朝日何用擾
擾隨輪蹄面顏憔悴暗塵土文字光彩垂虹霓空腸時如秋蚓
叫苦調或作寒蟬嘶語言雖巧身事拙捷徑恥蹈行非迷我今

俸祿飽餘賸念子朝夕勤鹽齏舟行每欲載米送汴水六月乾
無泥乃知此事尚難必何況仕路如天一作丹梯朝廷樂善得賢

眾臺閣俊彥聯簪犀朝陽鳴鳳為時出一枝豈惜容其棲古來

磊落材與知窮達有命理莫齊悠悠百年一瞬息俯仰天地身

醯雞其間得失何足校况與一作鷓鴣爭稗穉憶在洛陽年各一作各年

少對花把酒傾玻璃二十年間幾人在在者憂患多乖睽我今

三載病不飲眼眇不辨駟與驪壯心銷盡憶閒處生計易足纔

蔬畦優游琴酒逐漁釣上下林壑相攀躋及身疆一作壯健始為

樂莫待衰病須扶攜行當買田清潁上與子相伴把鋤犁

有馬示徐無黨

吾有千里馬毛骨何蕭森疾馳如奔風白日無留陰徐驅當大

道步驟中五音馬雖有四足遲速在吾心六轡應吾手調和如

瑟琴東西與南北高下山與林惟意所欲適九州可周尋至哉

人與馬兩樂不相侵伯樂識其外徒知價千金王良得其性此

術固已深良馬須善馭吾君可為箴

天辰

天形如車輪晝夜常不息三辰隨出沒曾不差分刻一本有其行亦何勤

乾健貴於北辰居其所帝座嚴尊極眾星拱而環大小一作小大各

有職不動以臨之任德不任力天辰主下土萬物由生殖一動

與一靜同功而異域惟王知法此所以治萬國

再和聖俞見答

兩畿相望東與西書來三日猶為稽短篇投子譬瓦礫敢辱報
之金裝蹄文章至寶被埋沒氣象往往于雲霓飛黃伯樂不世
一作出四顧驪首空長嘶嗟哉我豈敢一作能知子論詩一作經賴
子初指迷子言古淡有真味太羹豈須調以藿憐我區區欲彊
學跛鼈曾不離汗泥問子初何得臻此豈能直到無階梯如其
所得自勤苦何憚入海求靈犀周旋二紀陪唱和凡翼每並鸞
皇棲有時爭勝不量力何異弱魯攻彊齊念子京師苦憔悴經
年陋巷聽朝音潮一作晨雞兒啼妻噤一作喜午未飯得米寧擇秕與
稊石上紫豪家故有剡藤瑩滑如玻璃追惟平昔念少壯零落

生死嗟分睽一揮累紙恣奔放駿一作有若駕駱仍驂驪腹雖枵
虛氣豪橫猶勝諂笑病夏畦名聲不朽豈易得仕宦得路終當
躋年來無物不可愛花發有酒誰同攜問我居畱亦何事方春
苦旱憂民犁

感春雜言一本題下有和出公著

鳩鳴兮屋上雀噪兮簷間百鳥感春陽有如動機關雄雌相呼
和日夕聒聒不得閒砌下兩株樹枯條有誰攀春風一夜來花
葉何班班乃知天巧奪人力能使枯木生紅顏奈何人為萬物
靈不及草木與飛翾自從春來何所覺但怪睡美不覺白日高
南山行逢百花不着眼豈念四氣如同環卻思年少憶一作念前

事雖有駟駿難追還奈何來日尚可樂曾不勉彊相牽扳綠酒
如春波黃金為誰慳人生一世中一步一作笑百險艱俟河之清
不可得聊自歌此譏愚頑

廬山高贈同年劉中允歸南康

廬山高哉幾千仞兮根盤幾百里截然屹立乎長江長江西來
走其下是為揚瀾左里一作蠡兮洪濤巨浪日夕相舂撞雲消風
止水鏡淨泊舟登岸而遠望兮上摩青蒼一作雲霄以晦靄下壓厚
土之鴻厓試往造乎其間兮攀緣石磴窺空澗千巖萬壑響松
檜懸崖巨石飛流淙水聲聒聒亂人耳六月飛雪灑石矸仙翁
釋子亦往往而逢兮吾嘗惡其學幻而言咙但見丹霞翠壁遠

近映樓閣晨鐘暮鼓杳靄羅幡幢幽花野草不知其名兮風吹
露溼香澗谷時有白鶴飛來雙幽尊遠去不可極便欲絕世遺
紛癘羨君買田築室老其下插秧盈疇兮釀酒盈缸欲令浮嵐
暖翠千萬狀坐臥常對平軒窗君懷磊砢有至寶世俗不辨珉
與珎策名為吏二十載青衫白首困一邦寵榮聲利不可以苟
屈兮自非青雲白石有深趣其氣兀硜何由降丈夫壯節似君
少嗟我欲說安得巨筆如長杠

送徐生一作徐無黨之澠池

河南地望雄西京相公好賢天下稱吹噓死灰生氣燄談笑暖
律回嚴凝曾陪尊俎被顧盼羅列臺閣皆名卿一作徐生南國才能

後來秀得官古縣依嶠陵脚靴手板實卑賤賢雋未可吏事繩
攜文百篇赴知己西望未到氣已增我昔初官便伊洛當時意
氣尤驕矜主人樂士喜文學幕府最盛多交朋園林相映花百
種都邑四顧山千層朝行絲槐聽流水夜飲翠幙張紅燈爾來
飄流二十載鬢髮蕭索垂霜冰同時並遊在者幾舊事欲說無
人應一作鷹文章無用等畫虎名譽過耳如飛蠅榮華萬事不入
眼憂患百慮來填膺羨子年少一作少年正得路有如扶桑初日昇
名高場屋已得雋世有龍門今復登出門相送親與友何異籬
鷄瞻雲鵬嗟吾筆硯久已格感激短章一作章句因子興

葛氏鼎一本有歌字

大河昔決東南流蕭條東郡今遺湫我從故老問其由云古五
鼎藏高邱地靈川秀草木稠鬱鬱佳氣蒸常浮惟物伏見數有
周祕藏奇怪神所搜天昏地慘鬼哭幽至寶欲出風雲愁蕩搖
山川失維陬九龍大戰驅蛟虬剝然岸裂轟雲羸滑人夜驚鳥
嘲啁婦走抱兒扶白頭蒼生仰叫黃屋憂聚徒百萬如虬蟄千
金一掃隨浮漚天旋海沸動九州此鼎始出人間畱滑人得之
不敢收奇模古質非今侔器大難用識者不以示世俗遭擗撤
明堂會朝饗諸侯饗官百品供玉羞調以五味烹全牛時有用
捨吾無求二三子學雕琳球見之始驚中歎愀披荒斲古爭窮
菟苦語難出聲咿嚶馬圖出河龜一作龍負疇自古怪說何悠悠

嗟吾老矣不能休勉彊作詩慙效尤

太白戲聖俞 一作讀李白集效其體

開元無事 一作太平 二十年五兵不用太白閒太白之精下人間李

白高歌蜀道難蜀道之難難於上青天李白落筆生雲煙千奇

萬險不可攀卻視蜀道猶平川官娃扶來白已醉醉裏詩成醒

不記忽然 一作乘興 登山龍咆虎嘯松風寒山頭婆娑弄明

月九域塵土 一作下 悲人寰吹笙飲酒紫陽家紫陽真人駕雲

車空山流水空流花飄然已去凌青霞下看 一作堪笑 區區郊與島

螢飛露溼吟秋草

邊戶

家世為邊戶年年常備胡兒僮習鞍馬婦女能彎弧胡塵朝夕
起虜騎茂如無邂逅輒相射殺傷兩常俱自從澶州盟南北結
歡娛雖云免戰鬪兩地共賦租將吏戒生事廟堂為遠圖身居
界河上不敢界河漁

梅聖俞寄銀杏 一作和聖俞銀杏見寄代書之什

鷺毛贈千里所重以其人鴨腳雖百箇得之誠可珍問予得之
誰詩老遠且貧霜野摘林實京師寄時新封包雖甚微採掇皆
躬親物賤以人貴人賢棄而淪開緘重嗟惜詩以報慙慙

與子華原父小飲坐中寄同州江十學士休復

歲晚忽不樂相過偶乘閒百年纔幾時一笑得亦艱有酒醉嘉

客無錢買嬌鬟問予官何為侍從聯朝班朝廷多賢材何用蒯
與菅白髮垂兩鬢黃金腰九環奈何章綬榮飾此木石頑於國

略無補有慙常在顏幸蒙二三友相與文字間江子獨捨我一作
是高鴻去難攀秋風動沙苑郡閣當南山吟詠日多暇詔條寬

可頒寒雲雪一作暮紛糝幽鳥春絲蠻勝事日向好思君何時還

述懷

歲律忽其周陰風慘遼夏孤懷念時節朽質驚衰病憶始來京
師街槐綠方映清霜一以零眾木少堅勁物理固如此人生寧
久盛當時不樹立後世猶譏評顧我實孤生饑寒談孔孟壯年
猶勇為刺口論時政中間蒙選擢官實居諫諍豈知身愈危惟

恐職不稱十年困風波九死出檻穽再生君父恩知報犬馬性

歸來見親識握手相弔慶丹心皎雖存白髮生一作日已逆慙無

羽毛彩來與鸞皇並鍛翮追羣翔孤唳驚眾聽嚴嚴玉堂署清

禁肅而靜職業愧論思文章慙誥命厚顏難久居歸計無荒逕

偷閒就朋友笑語雜嘲詠歡情雖索寞得酒猶豪橫羣居固可

樂寵祿尤難幸何日早收身江湖一漁艇

和劉原父澄心紙一作奉賦
澄心堂紙

君不見曼卿子美真奇才久已零落埋黃埃子美生窮死愈貴

殘章斷橐如瓊瑰曼卿醉題紅粉壁壁粉已剝昏煙煤河傾崑

崑勢曲折雪壓太華高崔嵬自從二子相繼沒山川氣象皆低

摧君家雖有澄心紙有敢下筆知誰哉宣州詩翁餓一作欲死
 黃鵠折翼鳴聲哀有時得飽好言語似聽高唱傾金罍二子雖
 死此翁在老手尚能工翦裁奈何不寄反示我如棄正論求俳
 詼嗟我今衰不復昔空能把卷闔且開百年干戈流戰血一國
 歌舞今荒臺當時百物盡精好往往遺棄淪蒿萊君從何處得
 此紙純堅瑩膩卷百枚官曹職事喜一作閒暇臺閣唱和相追
 陪文章自古世不乏間出安知無後來

居士集卷第五終

居士集卷第六 全集六

二十七世孫衡校刊

古詩二十五首

奉使契丹道中答劉原父桑乾河見寄之作

憶昨初受命同下紫宸朝問君當何之笑指北斗杓共念到幾

時春風約回鑣所持旣異事前後忽相違歲月坐易一作失山

川行知遙回頭三千里雙闕在紫霄我老倦鞍馬安能事吟嘲

君才綽有餘新句益一作飄飄前日逢呂郭解鞍憩山腰僮僕

相問喜馬鳴亦蕭蕭出君桑乾詩寄我慰寂寥又喜前見君相

期駐征輶雖知不久留一笑樂亦聊歸路踐冰雪還家脫狐貂

君行我卽至春酒待相邀

書素屏

我行三千里何物與我親念此尺素屏曾不離我身曠野多黃沙當午白日昏風力若牛弩飛砂還射人暮投山椒館休此車馬勤開屏置牀頭輾轉夜向晨臥聽穹廬外北風驅雪雲勿愁明日雪且擁狐貂温君命固有嚴羈旅誠苦辛但苟一夕安其餘非所云

馬齧雪

馬饑齧雪渴飲一作行踏冰北風卷地來一作寒崢嶸馬悲躑躅人行日暮塗遠千山橫我謂行人止歎聲馬當勉力無悲鳴白溝

南望如掌平十里五里長

一作長亭與

短亭臘雪銷盡春風輕火燒

原頭青草生遠客還家紅袖迎樂哉人馬歸有程男兒雖有四

方志無事何須一作煩

勤遠征

風吹沙

一本題上有北字

北風吹沙千里黃馬行礪犖悲摧藏當一作窮

冬萬物慘顏一作無

色冰雪射日生一作爭

光芒一年百日風塵道安得朱顏長美好

攬鞍鞭一作起

鞭歸

馬行勿遲酒熟花開二月時

重贈劉原父

一作憶昨呈劉原父

憶昨君當使北時我往別君飲君家愛君小鬟初買得如手未觸新開花醉中上馬不知夜但見九陌燈火人誼譁歸來不記

與君別酒醒起坐空咨嗟自言我亦隨往矣行即逢君何恨邪
 豈知前後不相及歲一作日月忽忽行無涯古北嶺口踏新雪馬
 孟山西看落霞風雲一作雪暮慘矣道路礧谷夜靜聞麀麀行迷
 方嚮但看日度盡山險方逾一作行沙客心漸遠誠易感見君雖
 晚喜莫加我後君歸一作纔十日君先躍馬未足誇新年花發
 見回鴈歸路柳暗藏嬌鴉而今一作今來春物已爛漫念昔草木冰
 未芽人生每苦勞事役老去尚能憐物華從今有暇即相過安
 得載酒長盈車

贈沈遵

一作贈沈博士歌并序

一本序云予昔於滁州作醉翁亭於琅琊山有記刻石往往

傳人間太常博士沈遵好奇之士也聞而往遊焉愛其山水
 歸而以琴寫之作醉翁吟一調惜不以傳人者五六年矣去
 年冬予奉使契丹沈君會予恩冀之間夜闌酒半出琴而作
 之子既嘉君之好尚又愛其琴聲乃作歌以贈之

羣動夜息浮雲陰沈夫子彈醉翁吟醉翁吟以我名我初聞之

喜且驚宮聲三疊何泠泠酒行暫止四坐傾一本有為君屏百慮各以兩耳聽兩

句有如風輕日暖好鳥語夜靜山響春泉鳴坐思千巖萬壑醉

眠處寫君三尺膝上橫沈夫子恨君不為醉翁客不見翁醉一作

醉翁山間亭翁歡不待絲與竹把酒終日聽泉聲有時醉倒枕谿

石青山白雲為枕屏花間百鳥喚不覺日落山風吹自醒一本有沈

夫子君過滁陽今幾時滁人皆喜醉翁醉至今人人我時四十

能道之長記山間逢太守籃輦酌酹插花歸六句猶彊力自號醉翁聊戲客爾來憂患十年間一本客字下作爾來纔十年遇酒飲

不得軒裳外飾誠可榮鬢髮未老嗟先白滁人思我雖未忘見我今應不

能識沈夫子愛君一尊復一琴萬事不可干其心自非曾是醉

翁客莫向俗耳求知音一本未兩句作高懷所得貴自適俗耳何用求知音可笑人生不飲酒惟知自

首戀黃金

答聖俞一本題下有高車見過

人皆喜詩翁有酒誰肯一醉之嗟我獨無酒數往從一作就翁何

所為翁居南方我北走世路離合安可期汴渠千艘日上下來

及水門猶未知五年不見勞夢寐三日始往何其遲城東賺河

有名字萬家棄水為汗池人居其上苟賢者我視此水猶漣漪

入門下馬解衣帶共坐習習清風吹溼薪熒熒煮薄茗四顧壁

立空無遺萬錢方丈飽則止一瓢飲水樂可一作何涯况出新詩

數十首珠璣大小光陸離他人欲一不可有一作得君家筐篋滿

莫持才大多一作名高乃富貴豈比金紫包愚癡貴賤同為一邱

土聖賢獨長一作如星日垂道德內樂不假物猶一作所須朋友并

良時蟬聲漸已變秋意得酒安問醇與醜玉堂官閒無事業親

舊幸可從其私與翁老矣會有幾當棄百事勤追隨

感興五首齋於醴泉宮作

奉祠嚴祕館攝事罄精誠歲晏悲木落天寒聞鶴鳴念昔邱壑

趣豈知朝市情弱齡嬰仕宦壯節慕功名多病慙厚祿早衰歎
餘生未知犬馬報安得遂歸耕

懷祿不知慙人雖不吾責貧交重意氣握手猶一作獨感激煌煌

腰間金兩鬢颯已白有生天地間壽考非金石古人報一飯君

子不苟得憂來自悲歌涕淚下沾臆

清夜雖云長白日亦易晚循環百刻中勢若丸走坂盈虧自相

補得失何足算餐霞可延年飲酒誠自損未知辛苦長孰若適

意短二者一何偷百年皆不免顏回不著述後世存愈遠聖賢

非虛名惟善為可勉

仕宦希寸祿庶無飢寒迫讀書事一作為文章本以代耕織學成

頗自喜祿厚愈多責挾山以超海事有非其力君子貴量能無

輕食人食

唧唧復唧唧夜歎曉未息蟲聲急愈尖病耳聞若刺壯士易為

老良時難再得日月相隨東天行自西北二者不相謀萬古無

窮極安知人間世歲月忽已易

吳學士石屏歌一作和生鵝樹屏一無和字

晨光入林眾鳥驚臍膊羣飛鴉亂鳴穿林四散投空去黃口巢

中饑待哺雌者下啄雄高盤雄雌相呼飛復還空林無人鳥聲

樂古木參天枝屈蟠下有怪石橫樹一作其間煙埋草沒苔蘚斑

借問此景誰圖寫乃是吳家石屏者號工剗山取山骨朝鏡暮

斲非一日萬象皆從石中出吾嗟人愚不見天地造化一作造物之

初難乃云萬物生自然豈知鑄鏡刻畫醜與妍千狀萬態不可

殫神愁鬼泣晝一作日夜不得閒不然安得巧工妙手憊精竭思

不可到若無若有縹緲生雲煙鬼神功成天地惜藏在號山深

處石惟人有心無不獲一作乃知人天地雖神一作公藏不得

又疑鬼神好勝憎吾儕欲極奇怪窮吾才乃一作故傳張生自西

來吳家學士見且哈醉點紫毫淋墨煤君才自與鬼神鬪嗟我

老矣安能陪

初食車螯

一本題上云京師

纍纍盤中蛤來自海之涯坐客初未識食之先歎嗟五代昔乖

隔九州如剖瓜東南限淮海邈不通夷華於時北州人飲食陋

莫加雞豚為異味貴賤無等差自從聖人出天下為一家南產

錯交廣西珍富邛巴水載每連舳陸輸動盈車谿潛細毛髮海

怪雄鬚牙豈惟貴公侯閭巷飽魚鰕此蛤今始至其來何晚邪

螯蛾聞二名車螯一名車蛾久見南人誇璀璨殼如玉斑斕點生花含

漿不肯吐得火遽已呀共食惟恐後爭先屢成譁但喜美無厭

豈思來甚遐多慙海上翁辛苦斲泥沙

送裴如晦之吳江

一本無下三字注云席上分得已字

雞鳴車馬馳夜半聲未已皇皇走聲利與日爭寸晷而我獨何

為閒宴奉君子京師十二門四方來萬里顧吾坐中人暫聚浮

雲爾念子一扁舟片帆如鳥起文章富千箱吏祿求斗米白玉
有時沾青衫豈須恥人生足憂患合散乃常理惟應當歡時飲
酒如飲水

盤車圖

一本上題和聖命
不注呈楊直講

淺山嶙嶙亂石轟轟山石磽磽車碌碌山勢盤斜隨澗谷側轍
傾轅如欲覆出乎兩崖之隘口忽見百里之平陸坡長坂峻牛
力疲天寒日暮人心速楊衰一作生忍饑官太學得錢買此纔盈
幅愛其樹老石硬山回路轉高下曲直橫斜隱見妍媸嚮背各
有態遠近分毫皆可辨自言昔一作古有數家筆畫古一作久傳多
名姓失後來見者知謂誰乞詩梅老聊稱述古畫畫意不畫形

梅詩詠物無隱情忘形得意知者寡不若見詩如見畫乃知楊
生真好奇此畫此詩兼有之樂能自足乃一作即為富豈必金玉
名高貴朝看畫暮讀詩楊生得此可不饑

答梅

一作和
無梅字

聖俞莫登樓

在禮部貢院鎖試
進士上元夜作

莫登樓樂哉都人方競遊樓闕夜氣春煙浮玉輪東來從海陬
織靄洗盡當空雷鐙光月色爛不收火龍銜山祝千秋緣竿踏
索雜幻優鼓喧管咽耳欲啾清風嫋嫋夜悠悠瑩蹄文一作輪
蹄交
角車如流姪姹扶闌車兩頭髡髮垂鬟嬌未羞念昔年少追朋
儔輕衫駿馬今則不中年病多昏兩眸夜視曾不如鶴鷗足雖
欲往意已休惟思睡眠擁衾裯人心利害兩不謀春陽稍愆天

子憂安得四野陰雲油甘澤以時豐麥蕤遊騎踏泥非我愁

答聖俞莫飲酒

此已下皆
貢院中作

子謂莫飲酒我謂莫作詩花開木落蟲鳥悲四時百物亂我思
朝吟搖頭暮蹙眉雕肝琢腎聞退之此翁此語還自違豈如飲
酒無所知自古不飲無不死惟有爲善不可遲一作遺功施當世
聖賢事不然文章千載垂其餘酌酹一尊酒萬事崢嶸皆可齊
腐腸糟肉兩家說計較屑屑何其卑死生壽夭無足道百年長
短纔幾時但飲酒莫作詩子其聽我言非癡

思白兔雜言戲答公儀憶鶴之作

君家白鶴白雪毛我家白兔白玉毫誰將贈兩翁謂此二物皎

潔勝瓊瑤已憐野性易馴擾復愛仙格何孤高玉兔四蹄不解

舞不如雙鶴能清嘯低垂兩翅趁節拍

一作拍節

婆婆弄影誇嬌嬈

兩翁念此二物者久不見之心甚勞京師少年殊好尚意氣橫
出爭雄豪清尊美酒不輒飲千金爭買紅顏韶莫令少年聞我
語笑我乖僻遭譏嘲或被偷開兩家籠縱此二物令逍遙兔奔
滄海卻入明月窟鶴飛玉山千仞直上青松巢索然兩衰翁何
以慰無慘纖腰綠鬢既非老者事玉山滄海一去何由招

戲答聖俞

鶴行而啄青玉觜枯松腳兔蹲而纍尖兩耳攢四蹄往往於人

家高堂淨屋

一作室

曾見之錦裝玉軸掛壁垂乍見拭目猶驚疑

羽毛穆褫眼睛活若動不動如風吹主人矜誇百金買云此絕
筆人間奇畫師畫生不畫死所得百分三二爾豈如翫物翫其
真凡物可愛惟精神况此二物物之珍月光臨淨夜雪色凌清
晨二物於此時瑩無一點纖埃塵不惟可醒醉翁醉能使詩老
詩思添清新醉翁謂詩老子勿謂我愚老弄兔兒憐鶴雛與子
俱老其衰乎奈何反捨我欲向一作去東家看舞姝須防舞姝見
客笑白髮蒼顏君自照

和梅龍圖公儀謝鵬

有詩鶴勿喜無詩鵬勿悲人禽固異性所趣各有宜朝戲青竹
林暮棲高樹枝咿呦山鹿鳴格磔野鳥啼聲音不相通各以類

自隨使鶴居籠中垂頭以

一作似

聽詩鷓鴣享鐘鼓魚鳥見西施

鵬鶴不宜爭所爭良可知虬蜉與蟻子爲物固已微當彼兩交
鬪勇如聞鼓聲有心皆好勝未免爭是非於我一何薄於彼一
何私闌檻啄花卉叫號驚睡兒跳跟兩腳長落泊雙翅垂何足
充翫好於何定妍媸鵬口不能言夜夢以告之主人起謝鵬從
我今幾時僮奴謹守護出入煩提攜逍遙遂棲息飲啄安雄雌
花底弄日影風前理毛衣豈非主人恩報効爾宜思主人今白
髮把酒無翠眉養鶴鵬又妬我言堪解頤

和聖俞感李花

昨日摘花初見桃今日摘花還見李晴風暖日苦相催春物所

餘知有幾中年多病壯心衰對酒思歸未得歸不及牆根花與
草春來隨處自芳菲

折刑部海棠戲贈聖俞二首

搖搖牆頭花笑笑弄顏色荒涼眾草間露此紅的皜草木本無
情及時如自得青春不可恃白日忽已昃一作失非繞之重吟哦歸
坐成歎息人生浪自苦得酒且開釋不見宛陵翁作詩頭早白
搖搖牆頭花豔豔爭青娥朝見開尚少暮看繁已多不惜花開
繁所惜時節過昨日枝上紅今日隨流波物理固如此去一作古
來知奈何達人但飲酒壯士徒悲歌

刑部看竹效孟郊體

花妍兒女姿零落一何速竹色君子德猗猗寒更綠京師多名
園車馬紛馳逐春風紅紫時見此蒼翠玉凌亂迸青苔蕭疎拂
華屋森森日影閒濯濯生意足幸此接清賞寧辭薦芳醪黃昏

人去

一作黃昏寂寂
一作寂寂人去

鎖空廊枝上月明春

一作看

鳥宿

居士集卷第六終

居士集卷第七 全集七

二十七世孫衡校刊

古詩二十二首

贈沈博士歌

遵醉翁吟一作

沈夫子胡為醉翁吟醉翁豈能知爾琴滁山高絕滁水深空巖

悲風夜吹林山

一作泉

湍白玉懸青岑一瀉萬仞源莫尋醉翁每

來喜登臨醉倒石上遺其簪雲荒石老歲月侵子有三尺徽一作

暉黃金寫我幽思窮崎嶇自言愛此萬仞水謂是太古之遺音

泉淙石亂到不平指下嗚咽悲人心時時弄餘聲言語軟滑如

春禽嗟乎沈夫子爾琴誠工彈且止我昔被謫居滁山名雖一作

雖名為翁實少年坐中醉客誰最賢杜彬琵琶皮作絃自從彬死

世莫傳玉練鎖東坡詩云新客從翻玉連鎖練疑當作連聲入黃泉死生聚散日零

落耳冷心衰翁索莫國恩未報慙祿厚世事多虞嗟力薄顏摧

鬢改真一翁必以一作已憂醉安知樂沈夫子謂我翁言何苦悲

人生百年間飲酒能幾時攬衣推琴起視夜仰見河漢西南移

和聖俞李侯家鴨腳子

鴨腳生江南名實未相浮絳囊因入貢銀杏貴中州致遠有餘

力好奇自賢侯因令江上根結實夷門秋始摘纔三四金奩獻

凝旒公卿不及識天子百金酬歲久子漸多纍纍枝上稠主人

名好客贈我比珠投博望昔所徙蒲萄安石榴想其初來時厥

價與此侔今也徧中國籬根及牆頭物性久雖在人情逐時流

惟當記其始後世知來由是亦史官法豈徒續君謳京師無鴨腳樹駙馬

都尉李和文自南方移植其地

送吳生南歸一作送吳孝京字子京

自我得曾子於茲二十年今又得吳生既得喜且歎古士不並

出百年猶比肩區區彼江西其產多材賢吳生初自疑所擬豈

其倫我始見曾子文章初亦然崑崙傾黃河渺漫盈百川決疏

以道一作導之漸斂收橫瀾東溟知所歸識路到不難吳生始見

我袖藏新文篇一作編忽從布褐中百寶寫一作瀉我前明珠雜璣

貝磊砢或不圓問生久懷此柰何初無聞吳生不自隱欲吐羞

俛顏少也不自重不為鄉人憐中雖知自悔學問苦賤貧自謂
久而信力行困彌堅今來決疑惑幸冀蒙洗滌我笑謂吳生爾
其聽我言世所謂君子何異於眾人眾人為不善積微成滅身
君子能自知改過不逡巡惟於斯二者愚智遂以分顏回不貳
過後世稱其仁孔子過而更日月披浮雲子路初來時雞冠佩
豸豚斬蛟射白額後卒為名臣子既悔其往人誰禦其新醜夫
祀上帝孟子豈不云臨行贈此言庶可以書紳

樂哉襄陽人送劉太尉從廣

一作赴襄陽 一本廣景元字景元

嗟爾樂哉襄陽人萬屋連囊清漢濱語言輕清微帶秦南通交
廣西岷岷羅穀織麗藥物珍枇杷甘橘薦清罇磊落金盤爛璘

璘槎頭縮項昔所聞黃橙擣

一作橙擣新

藿香復辛春雷動地行走

根錦苞玉筍味爭新鳳林花發南山春掩映谷口藏山門樓臺
金碧瓦鱗鱗峴首高亭倚浮雲漢水如天瀉沔沔斜陽返照白
鳥羣兩岸桑柘雜耕耘文王遺化已寂寞千載誰復思其仁荆
州漢魏以來重古今相望多名臣嗟爾樂哉襄陽人道扶白髮
抱幼孫遠迎劉侯朱兩一作朱輪劉侯年少氣甚淳詩書學問若
寒士樽俎談笑多嘉賓往時邢沼一作臺有善政至今遺愛畱其
民誰能持我詩以往為我先賚襄陽人

奉酬揚州劉舍人見寄之作

原父一作酬劉原父見寄

別君今幾時歲月如插羽悠悠寢與食忽忽朝復暮紛紛竟何

為凜凜還自懼朝廷無獻納倉廩徒耗蠹風霜苦見侵衰病日
增故江湖豈不思懇悃布已屢美哉廣陵公風政傳道路優游
侍從臣左右天子顧君來一何遲我請亦有素何當兩還分尚
冀一相遇把酒或未能尺書幸時寓

西齋手植菊花過節始開偶書奉呈聖俞

秋風吹浮雲寒雨灑清曉鮮鮮牆下菊顏色一何好好色豈能
常得時仍不早文章損精神何用覩天巧四時悲代謝萬物惜
凋槁豈知寒檻中兩鬢甚秋草東城彼詩翁學問同少年一作小
風塵世事多日月良會少我有一樽酒念君思共倒上浮黃金
藥送以清歌裊為君發朱顏可以卻君老

於劉功曹家見楊直講衰女奴彈琵琶戲作呈聖俞

大絃聲遲小絃促十歲嬌兒彈啄木啄木不啄新生枝惟啄槎
牙一作牙槎枯樹腹花繁蔽日鎖空園樹老參天杳深谷不見啄木
鳥但聞啄木聲春風和暖百鳥語山路礪确行人行啄木飛從
何處來花間葉底時丁丁林空山靜啄愈響行人舉頭飛鳥驚
嬌兒身小指撥硬功曹廳冷絃索鳴繁聲急節傾四坐為爾飲
盡黃金觥楊君好雅心不俗太學官早飯脫粟嬌兒兩幅青布
裙三腳木牀坐調曲奇書古畫不論價盛以錦囊裝玉軸披圖
掩卷有時倦臥聽琵琶仰看屋客來呼兒旋梳洗滿額花鈿貼
黃菊雖然可愛眉目秀無奈長饑頭頸縮宛陵詩翁勿謂渠人

生自足乃為娛此兒此曲翁家無

長句送陸子履學士通判宿州

一本作亳州非

古人相馬不相皮瘦馬雖瘦骨法奇世無伯樂良可嗤千金市

馬惟市一作其肥驥驥伏櫪兩耳垂夜聞秋風仰秣嘶一朝絡以

黃金羈旦刷一作發吳越暮燕陔丈夫可憐憔悴時世俗庸庸皆

見遺子履自少聲名馳落筆文章天下知開懷吐胸不自疑世

路迫窄多弄機鬢毛零落風霜摧十年江湖千首詩歸來京國

舊遊非大笑相逢索酒厄酒酣猶能弄蛾眉山川搖落百草腓

愛君不改青松枝念君明當整驂駢贈以瑤華期早歸豈惟朋

友相追隨坐使臺閣生光輝

送公期得假歸絳

風吹積雪銷太行水暖河橋楊柳芳少年初仕即京國故里幾

歸成鬢霜山行馬瘦春泥滑野飯天寒餽粥香畱連芳一作物

佳節過東帶還來朝未央

送宋次道學士敏求赴知太平州

古堤老柳藏一作楊柳排春煙桃花水下清明前江南太守見之笑

擊鼓插旗催解船一作打鼓插旗催發船侍中令德宜有後學士清才方

少年文章秀粹得家法筆畫黠綴多餘一作逾妍藏書萬卷復強

記故事累朝能口傳來居侍從乃其職遠置州郡誰謂別本多作為

然交游一時盡英一作豪俊車馬兩岸來聯翩船頭朝轉暮千里

有酒胡不爲一作爲不留連

謝觀文王尚書舉正惠西京牡丹

京師輕薄兒意氣多豪俠爭誇朱顏事年少肯慰白髮將花插

尚書好事與俗殊憐我霜毛苦蕭颯贈以一作寄贈洛陽花滿盤鬪

麗爭奇紅紫雜兩京相去五百里幾日馳來足何捷紫檀金粉

香未吐綠萼紅苞露猶泔謂我嘗爲洛陽客頗向此花曾涉獵

憶昔進士初登科始事相公沿吏牒河南官屬盡賢俊洛城池

一作苑藥相連接我時年纔二十餘每到花開如蛺蝶姚黃魏紫

腰帶鞋潑墨齊頭藏綠葉鶴翎添色又其次此外雖妍猶婢妾

爾來不覺三十年歲月纔如熟羊胛無情草木不改色多難人

生自摧拉見花了了雖舊識感物依依幾技睫念昔逢花必沾

酒起坐驩呼屢傾榼而今得酒復何爲愛花繞之空百匝心衰

力懶難勉強與昔一何殊勇怯感公意厚不知報墨筆淋漓口

徒囁

送朱職方表臣提舉運鹽

齊人謹一作建鹽筴伯者之事爾計口收其餘登耗以生齒民充

國亦富粲若有條理惟一作雖非三王法儒者猶爲恥後世益不

然權奪由漢始權量自持操屑屑已甚矣穴竈如蜂房熬波銷

海水豈知戴白民食淡有至死物艱利愈厚令出姦隨起良民

陷盜賊峻法難禁止問官得幾何月課煩笞箠公私兩皆然巧

拙可知已英英職方郎文行粹而美連年宿與泗有政皆可紀
忽來從辟書感激赴知已閔然哀遠人吐策獻天子治國如治
身四民猶四體柰何窒其一無異欽厥趾工作而商行一作與商賈
本末相表裏臣請通其流為國掃泥滓金錢歸府藏滋味飽閭
里利害難先言歲月可較比鹽官皆謂然丞相曰可喜適時乃
為才高論徒譎詭夷吾苟一作復出未以彼易此隋堤樹珍珍
汴水流瀾瀾子行其勉旃吾黨方傾耳

嘗新茶呈聖俞

建安三千里京師三月嘗新茶人情好先務取勝百物貴早相
矜誇年窮臘盡春欲動蟄雷未起驅龍一作龍未起驅蟲蛇夜間擊鼓

滿山谷千人助叫聲喊呀萬木寒癡睡不醒惟有此樹先萌芽
乃知此為最靈物宜一作疑其獨得天地之英華終朝採摘不盈

掬通犀鍔小圓復窠鄙哉穀雨槍與旗多不足貴如刈麻建安

太守急寄我香蕝包裹封題斜泉甘器潔天色好坐中揀擇客

亦嘉一作佳新香嫩色如始造不似來遠從天涯停匙側盞試水

路拭目向空看乳花可憐俗夫把金錠一作挺一作錠茶錄多用挺字為古按集韻錠

字去聲訓錠錠字上聲訓銅鐵撲猛火炙背如蝦蟆由來真物有真賞坐逢詩

老頻咨嗟須臾共起索酒飲何異奏雅終淫哇

次韻再作一本云茶歌

吾年向老世味薄所好未衰惟飲茶建谿苦遠雖不到自少嘗

見閩人誇每噍江浙凡茗草叢生狼藉惟藏蛇今江浙茶園俗云多蛇豈

如含膏人香作金餅蜿蜒兩龍戲以呀其餘品第亦奇絕愈小

愈精皆露芽泛之白花如粉乳乍見紫面生光華手持心愛不

欲碾有類弄印幾成窠論功可以療百疾輕身久服勝一作胡

麻我謂斯言頗過矣其實最能祛睡邪茶官貢餘偶分寄地遠

物新來意嘉親烹屢酌不知厭自謂此樂真一作誠無涯未言久

食成手鷁已覺疾饑一作病生眼花客遭水厄疲捧椀口吻無異

蝕月墓僮奴傍視疑復笑嗜好乖僻誠堪嗟更蒙酬句怪可駭

兒曹助噪聲哇哇

樂郊詩為劉原甫作一本注原父鄆州東園也

樂郊何所樂所樂從公遊三日公不出其民蹙然愁一聞車馬

音從者如雲浮吾問鄆之人無乃失業不云惟安其業然後樂

其休樂郊何所有胡不考公詩有山在其東有水出透夷有臺

以臨望有沼以游嬉俯仰迷上下朱闌映清池草木非一種青

紅隨四時其餘雖瑣屑處置各有宜樂郊何以名吾為本其意

自古賢哲人所存非一世當時偶然迹來者因不廢鄆非公久

畱公去民孰賴此亭公所登此樹公所憇俾民百年思豈取一

日醉

洗兒歌為聖俞作一本云前日送酒遂助洗兒輒成短歌更資一笑呈聖俞

月暈五色如虹霓深山猛虎夜生兒虎兒可愛一作光陸離開

眼已有百步威詩翁雖老神骨秀想見嬌嬰目與眉木星之精
為紫氣照山生玉水生犀兒一作此翁不比他兒翁三十年名天

下知材高位下衆所惜天與此兒聊慰之翁家洗兒衆人喜不

莫一作惜金錢散閭一作隣里宛陵他日見高門車馬煌煌梅氏子

鳴鳩崇政殿後
考試所作

天將陰鳴鳩逐婦鳴中林鳩婦怒啼無好音天雨止鳩呼婦歸

鳴且喜婦不亟歸一作急還呼不已逐之其去恨不早呼不肯來固

其理吾老病骨知陰晴每愁天陰聞此聲日長思睡不可得遭

爾聒聒何時停衆鳥笑鳴鳩爾拙固無匹不能娶巧婦以共營

家室寄巢生子四散飛一身有婦長相失夫婦之恩重太山背

恩棄義須臾間心非無情不得已物有至拙誠可憐君不見人

心百態巧且艱臨危利害兩相關朝為親戚暮仇敵自古常嗟

交道難

代鳩婦言

一本注聞士有
欲棄妻者作

姍然錦翼花簇簇雄雌相隨樂不足抱雛出卵翅羽成豈料一

羽還反目人言嫁雞逐雞飛安知嫁鳩被鳩逐古來有盛必有

衰富貴莫忘貧賤時女棄父母嫁一作婦曰歸中道捨君何所之

天生萬物各有類誰謂鳥獸為無知雖無仁義有情愛苟聞此

言寧不悲

看花呈

一有韓字

子華內翰

崇政殿後
考試作

老雖可憎還可嗟病眼昏愁看花不知花開桃與李但見紅
白何交加春深雨露洗新濯日暖金碧相輝華浮香著物收不
得含意欲吐情無涯可愛疎簾靜相對最宜落日初西斜時傾
賜壺共斟酌及此蜂鳥方謹譁凡花易見不足數禁籞難到堪
歸誇老病對此不知厭年少何用苦思家

啼鳥 崇政殿後考試舉人卷子作

提葫蘆提葫蘆不用沽美酒官一作壺日賜新醖醅老病足以

扶衰朽百舌子百舌子莫道泥滑滑宮花正好愁雨來暖日方
催花亂發苑樹千重綠暗春珍禽綵羽自成羣花間祇慣迎黃
屋鳥語初驚見外人千聲百轉忽飛去一作枝上自落紅紛紛

畫簾陰陰隔宮燭禁漏杳杳深千門可憐枕上五更聽不似滌
州山裏聞

和聖俞 一本二字作人唐書局後叢莽中得芸香一本之作用其

韻

有芸黃其華在彼衆草中清香濯曉露秀色搖春風幸依華堂
陰一顧曾不蒙大雅彼君子偶來從學宮文章高一世論議一作
議伏羣公多識由博學新篇匪雕蟲唱酬爛衆作光輝發幽叢
在物苟有用得時寧久窮可嗟凡草木蜚壤自青紅

答劉原父舍人見過後中夜酒定復追昨日所覽雜記并
簡梅聖俞之作

君子忽我顧一作顧我貧家復何有虛堂來清風佳果薦濁酒簡編記遺逸論議相可否欲知所書人其骨多已朽前者既已然後來寧得久所以昔人云杯行莫停手

居士集卷第七終

居士集卷第八 全集八

二十七世孫衡校刊

古詩二十一首

有贈余以端谿綠石枕與蘄州竹簟皆佳物也余既喜睡而得此二者不勝其樂奉呈原父舍人聖俞直講

端谿琢出缺月樣蘄州織成雙水

一作錦

紋呼兒置枕展方簟赤

日正午天無雲黃琉璃光綠玉潤瑩淨冷滑無埃

一作織

塵憶昨

開封暫陳力屢乞殘骸避煩劇聖君哀憐大臣閔察見衰病非

虛飾猶蒙不使如

一作加

罪去特許遷官還舊職選材臨事不堪

用見利無慙惟苟得一從儻舍

一作屋

居城南官不坐曹門

一作開

少客自然唯與睡相宜以懶遭一作閒何愜適從來羸茶苦疲

困况此煩歎正炎赫少壯喘息人莫聽中年鼻鼾尤惡聲癡兒

掩耳謂雷作竈婦驚窺疑釜鳴蒼蠅蠓蠅任緣撲蠹一作書懶

架拋縱橫神昏氣濁一如此言語思慮何由清嘗聞李白好飲

酒欲與錨杓同生死一作我今好睡又過之身與二物為三爾

江西得請在旦暮收拾歸裝從此始終當卷簾攜枕去築室買

田清穎尾

夜聞風聲有感奉呈原父舍人聖俞直講

夜半羣動息有風生樹端颯然飄我衣起坐為長歎苦暑君勿

厭初涼君勿歡暑在物猶盛涼歸歲將寒清霜忽以飛零露亦

溥溥霜露一作本無情豈肯私蕙蘭不獨草木爾君形安得完

櫛髮變新白鑑容銷一作故丹風埃共侵迫心志亦摧殘萬古

一飛隼兩曜雙跳丸擾擾賢與愚流沙逐驚湍其來固如此獨

久知誠難服食為藥悞此言真不刊但當飲美酒何必被輕紈

答梅聖俞大雨見寄

夕雲若頽山夜雨如決渠俄然見青天燄燄升蟾蜍倏忽陰氣

生四面如吹噓狂雷走昏黑驚電照夔魑搜尋起龍蟄下擊墓

與墟雷聲每軒轟雨勢隨疾徐初若浩莫止俄收聞無餘但掛

千丈虹紫翠橫空虛頃刻百變態晦明誰卷舒豈知下土人水

潦沒襟裾擾擾泥淖中無異鴨與豬嗟我來京師庇身無弊廬

開坊儼古屋卑陋雜里閭鄰注湧溝竇街流溢庭除出門愁浩
渺閉戶恐爲瀦牆壁豁四達幸家無貯儲蝦蟆鳴竈下老婦但
欲歔九門絕來薪朝爨欲毀車歷溺委性命焉能顧圖書乃知
生堯時未免憂爲魚梅子猶念我寄聲憂我居慰我以新篇琅
琅比瓊琚官閒行能薄補益愧空疎歲月行晚矣江湖盍歸與
吾居傳郵爾此計豈躊躇

答聖俞白鸚鵡雜言

憶昨滁山之人贈我玉兔子粵明年春玉兔一有死日陽晝出
子字月夜明世言兔子望月生謂此瑩然而白者譬夫水之爲雪而
爲冰皆得一陰凝結之純精常恨處非大荒窮北極寒之曠野

養違其性天厥齡豈知火維地荒絕漲海連天沸天一作火熱

黃冠黑距人語言有鳥玉衣尤皎潔乃知物生天地中萬殊難

以一理通海中洲一作州鳥窮人迹來市廣州纔八國其間注輦

來最稀一作遠此鳥何年隨海舶誰能徧歷海上峯萬怪千奇安

可極兔生明月在天玉兔不能久人間况爾來從炎瘴地豈

識中州霜雪寒渴雖有飲饑有啄羈絆終知非爾樂天高海濶

路一作終茫茫嗟爾身微羽毛弱爾能識路知所歸吾欲開籠縱

爾飛俾爾歸詫宛陵詩此老詩名聞四夷

清明前一日韓子華以靖節斜川詩見招遊李園旣歸遂
苦風雨三日不能出窮坐一室家人輩倒殘壺得酒數杯

泥深道路無人行去市又遠索於筐筥一作得枯魚乾鰕

數種彊飲疾醉昏然便寐既覺索然因書所見奉呈聖俞

少年喜追隨老大厭誼譁慙愧二三子邀我行看花花開豈不

好時節亦云嘉因病既不飲眾歡獨成一作嗟管絃暫過耳風

雨愁還家三日不出門堆厖類寒鴉妻兒強我飲釘餽果與瓜

濁酒傾殘壺枯魚雜乾鰕小婢立我前赤腳兩髻了軋軋鳴雙

絃正如舫嘔啞坐令江湖心浩蕩思無涯寵祿不知報鬢毛今

已華有田清潁間尚可事桑麻安得一黃犢幅巾駕柴車

奉答原甫見過寵示之作

不作流水聲行將二十年吾生少賤足憂患憶昔有罪初南遷

飛旆洞庭入白浪墮淚三峽聽流泉援琴寫得入此曲聊以自

慰窮山間中間永陽亦如此醉臥幽谷聽潺湲自從還朝戀榮

一作寵祿不覺鬢髮俱凋殘耳衰聽重手漸顫自惜指法將誰傳

偶欣日色曝書畫試拂塵埃張斷絃嬌兒癡女遠翁膝爭欲彊

翁聊一彈紫微閣老適我過愛我指下聲冷然戲一作君此是

伯牙曲自古常歎知音難君雖不能琴能得琴一作意斯為賢

自非樂道甘寂寞誰肯顧我相畱連興闌束帶索馬去卻鎖塵

匣包青氈

會飲聖俞家有作兼呈原父景仁聖從

憶昨九日訪君時正見堦前兩叢菊愛之欲繞行百匝庭下不

國朝文忠公全集 卷八
能容我足折花卻坐時嗅之已醉還家手猶馥今朝我復到君
家兩菊堦前猶對束枯莖槁葉苦風霜無復滿叢金間綠京師
誰家不種花碧砌朱闌敞華屋柰何來對兩枯株共坐窮簷何
局促詩翁文字發天葩豈比青紅凡草木凡草開花數日間天
葩無根長在目遂令我每飲君家不覺長餅臥牆曲坐中年少
皆賢豪莫怪我今雙鬢禿須知朱顏不可恃有酒當歡一作且飲
相屬

依韻奉酬聖俞二十五兄見贈之作

與君結交遊我最先衆人我少既多難君家常苦貧今爲兩衰
翁髮白面亦皺念君懷中玉不及市上珉珉賤易爲價玉棄久

埋塵惟能吐文章白虹射星辰幸同居京城遠不隔重闥朝罷
二三公隨我如魚鱗君聞我來喜置酒畱逡巡不待主人請自
脫頭上巾歡情雖漸鮮老意益相親窮達何足道古來茲理均

小飲坐中贈別祖擇之赴陝府

明日君當千里行今朝始共一尊酒豈惟明日難重持試思此
會何嘗有京師九衢十二門車馬煌煌事奔走花開誰得屢相
遇盞到莫辭頻舉手驩情落寞酒量減置我不須論老朽奈何
公等氣方豪雲夢正當吞八九釋之名聲重當世少也多奇晚
方偶西州政事藹風謠右掖文章煥星斗待君歸日我何爲手
把鋤犁汝陰叟

奉答聖俞達頭魚之作

吾聞海之大物類無窮極蟲鰕淺水間羸蜋如山積毛魚與鹿

角一禽一作拾數千百收藏各有時嗜好無南北其微一作小既若

斯其大有一作其大固莫測波濤浩渺中島嶼生頃刻俄而沒

不見始悟一作久始出背脊有時隨潮來暴死疑遭謫海人相呼集

刀鋸爭剖一作斫析骨節駭專車鬚芒一作牙伴劔戟腥聞數十里

餘臭久乃息始知百川歸固有含容德潛奇與祕寶萬狀一作物

不一識嗟彼達頭微誰傳到一作偶傳到京國乾枯少滋味治

從此得京師人不識此魚滄州向防洗費炮炙聊茲知異物豈足薦佳客一旦辱一作得君詩虛名

送刁紡推官一本無歸潤州二字

翹翹名家子自少能慷慨嘗從幕府辟躍馬臨窮塞是時西邊

兵屢戰輒一作無奔潰歸來買良田俛首學秉耒家為白酒醇

門掩青山對優游可以老世利何足愛奈何從所知又欲向并

代主人忽南遷此計亦一作乃中悔彼在吾往一作乃從彼去吾亦

退與人交若此可以言節槩

夜坐彈琴有感二首呈聖俞

吾愛陶靖節有琴常自隨無絃人莫聽此樂有誰知君子篤自

信眾人喜隨時其中苟有得外物竟何為寄謝伯牙子何須鍾

子期

鍾子忽已死伯牙其已乎絕絃謝世人知音從此無瓠巴魚自
躍此事見於書師曠嘗一鼓羣鶴舞空虛吾恐二三說其言皆
過與不然古今人愚智邈已殊奈何人有耳不及鳥與魚

二月雪

寧傷桃李花無損杞與菊杞菊吾所嗜惟恐食不足花開少年
事不入老夫目老夫無遠慮所急在口腹風晴日暖雪初銷踏
泥自採籬邊綠

歸田四時樂春夏二首 秋冬二首命聖俞分作

春風二月三月時農夫在田居者稀新陽晴暖動膏脈野水泛
澌生光輝鳴鳩聒聒屋上啄布穀翩翩桑下飛碧山遠映丹杏
發青草暖眠黃犢肥田家此樂知者誰吾獨知之胡不歸吾已
買田清潁上更欲臨流作釣磯

南風原頭吹百草草木叢深茅舍小麥穗初齊稚子嬌桑葉正
肥蠶食飽老翁但喜歲年熟餉婦安知時節好野棠梨密啼晚
鶯海石榴紅轉山鳥田家此樂知者誰我獨知之歸不早乞身
當及彊健時顧我蹉跎已衰老

明妃曲和王介甫作

胡人以鞍馬為家射獵為俗泉甘草美無常處鳥驚獸駭爭馳
逐誰將漢女嫁胡兒風沙無情貌如玉身行不遇中國人馬上
自作思歸曲推手為琵琶胡人共聽亦咨嗟玉顏流落死

天涯琵琶

一作此曲

卻傳來漢家漢宮爭按新聲譜遺恨已深聲更

苦織織女手生洞房學得琵琶不下堂不識黃雲出塞路豈知

此聲能斷腸

盆池

西江之水何悠哉經歷瀨石險且回餘波拗怒猶

一作涵去澹

奔濤擊浪常喧虺有時夜上滕王閣月照淨練

一作緣

無織埃揚

瀾左里在其北無風浪起傳古來老蛟深處厭窟穴蛇身微行

見者猜呼龍瀝酒未及祝五色粲

一作照

爛高崔嵬忽然遠引千

丈去百里水面中分開收蹤滅跡莫知處但有雨雹隨風雷千

奇萬變聊一戲豈

一作肯

顧溺死為可哀輕人之命若螻蟻不止

山嶽將傾頽此外魚鰕何足道厭飫但覺腥盤杯壯哉豈不快

耳目胡為守此空牆隈陶盆斗水仍下漏四岸久雨生莓苔遊

魚撥撥不盈寸泥潛日炙愁暴鰓魚誠不幸此跼促我能決去

反徘徊

再和明妃曲

漢宮有佳

一作美

人天子初未識一朝隨漢使遠嫁單于國絕色

天下無一失難再得雖能殺畫工於事竟何益耳目所及尚如

此萬里安能制夷狄漢計誠已拙女

一作美

色難自誇明妃去時

淚灑向枝上花狂風日暮起飄泊落誰家紅顏勝人多薄命莫

怨春風當自嗟

奉送原甫侍讀出守永興 一作奉送永興安撫劉侍讀

酌君以荊州魚枕之蕉贈君以宣城鼠須之管酒如長虹飲滄

海筆若駿馬馳平坂愛君尚 年 少力方豪嗟我久衰歡漸鮮

文章驚世知 聞 作名早意氣論交相得晚魚枕蕉一舉十分當

覆盞鼠須管為物雖微情不淺新詩醉墨時一揮別後寄我無

辭遠

哭聖俞

昔逢詩老伊水頭青衫白馬渡伊流灘聲八節響石樓坐中辭

氣凌清 一作高 秋一飲百盞不言休酒酣思逸語更道河南丞相

稱賢侯後車日載枚與鄒我年最少力方優明珠白璧相報投

詩成希深擁鼻謳師魯卷舌藏戈矛三十年間如轉眸屈指十

九歸山邱凋零所餘身百憂晚登玉墀侍珠旒詩老薶鹽太學

愁乖離會合謂無由此會天幸非人謀頷鬚已白齒根浮子年


加我貌則不歡猶可彊開屢偷不覺歲月成淹留文章落筆動

九州釜餽過午無饋餽良時易失不早收篋櫝 一作櫃 瓦礫遺琳

璆薦賢轉石古所尤此事有職非吾羞命也難知理莫求名聲

赫赫掩諸幽翩然素旒歸一舟送子有淚流如溝

居士集卷第八終



居士集卷第九 全集九

二十七世孫衡校刊

古詩三十首

寄題劉著作義叟家園效聖俞體

嘉子治新園乃在太行谷山高地苦寒當樹所宜木羣花媚春
 陽開落一何速凜凜心節奇惟應松與竹毋栽當暑權寧種深
 秋菊菊死抱枯枝權豔隨昏旭黃楊雖可愛南土氣常燠未知
 經雪霜果自保其綠顏色苟不衰始知根性足此外衆草花徒
 能悅凡目千金買姚黃慎勿同流俗

西齋小飲贈別陝州冲卿學士

分得黃字爲韻

今日胡不樂衆賓會高堂坐中瀛洲客新佩太守章豈無芳尊
酒笑語共一觴亦有嘉一作佳菊叢新苞弄微黃所嗟時易晚節

物已淒涼羣鷺方盛集離鴻獨高翔山川正搖落行李怯風霜
君子樂爲政朝廷須雋良歸來紫微閣遺愛在甘棠

奉答原甫九月八日見過會飲之作

老大惜時節少年輕別離我歌君當和我酌君勿辭豔豔庭下
菊與君吟繞之擷其黃金蕊泛此白玉卮君勿愛此花問君此
何時秋風日益高霜露漸離披芳歲忽已晚朱顏從此衰念君
將捨我車馬去有期君行一何樂我意獨不怡飛兔不戀羣奔
風誰能追老驥但伏櫪壯心良可悲

予作歸鴈亭於滑州後十有五年梅公儀來守是邦因取

余詩刻于石又以長韻見寄因以答之

一作和滑州公儀
龍圖歸鴈亭長句

風吹城頭秋草黃仰見鳴鴈初南翔秋草風吹春復綠南鴈北

飛聲肅肅城下臺邊桃李蹊憶初披荒手植之雪消冰解草木

動因記鴻

一作欲
記南

鴈將歸時爾來十載空遺迹飛鴈年年自南

北臺傾餘址草荒涼樹老無花春寂歷東州太守詩尤美組織

文章爛如綺長篇大句琢方石一日都城傳百紙我思古人無

不然慷慨

一作感概

功名垂百年沈碑身後念陵谷把酒泣下悲山

川一時畱賞雖邂逅後世傳之因不朽

寄題洛陽致政張少卿靜居堂

洛人皆種花花發有時闌君家獨種玉種玉產琅玕子弟守家
法名聲聳朝端歲時歸拜慶閭里亦相歡西臺有道氣自少服
靈丸春酒養眉壽童顏如渥丹清談不倦客妙思喜揮翰壯也
已吏隱興餘方掛冠臨風想高誼懷祿愧盤桓

鬼車

嘉祐六年秋九月二十有八日天愁無光月不出浮雲蔽天衆
星沒舉手嚮空如抹漆天昏地黑有一物不見其形但聞其聲
其初切切淒淒或高或低乍似玉女調玉笙衆管參差而不齊
旣而咿咿呦呦若軋若抽又如百兩江州車回輪轉軸聲啞嘔
鳴機夜織錦江上羣鴈驚起蘆花洲吾謂此何聲初莫窮端由

老婢撲燈呼兒曹云此怪鳥無足儔其名爲鬼車夜載百鬼凌
空遊其聲雖小身甚大翅如車輪排十頭凡鳥有一口其鳴已
啾啾此鳥十頭有十口口插一舌連一一作喉一口出一聲千

聲百響更相酬昔時周公居東周厭聞此鳥憎若讎夜呼庭氏
率其屬彎弧俾逐出九州射之三發不能中天遣天狗從空投
自從狗嚙一頭落斷頸至今青血流爾來相距三千秋晝藏夜
出如鶴鷗每逢陰黑天外過乍見火光驚輒墮有時餘血下點

汚鳥臥反

所遭之家家必破我聞此語驚且疑反祝疾飛無我禍

我思天地何茫茫百物巨細理莫詳吉凶在人不在物一蛇兩
頭反爲祥卻呼老婢炷燈火捲簾開戶清華堂須臾雲散衆星

出夜靜皎月流清光

感二子

黃河一千年一清岐山鳴鳳不再一作載鳴自從蘇梅二子死天

地寂默收雷聲百蟲坏戶不敢蟄萬木逢春不發萌豈無百鳥

解言語喧啾終日無人聽二子精思極搜抉天地鬼神無遁情

及其放筆騁豪俊筆下萬物生光榮古人謂此覩天巧命短疑

為天公憎昔時李杜爭橫行麒麟鳳凰世所驚二物非能致太

平須時太平然後生開元天寶物盛極自此中原疲戰爭英雄

白骨化黃土富貴何止浮雲輕唯有文章爛日星氣凌山岳常

崢嶸賢愚自古皆共盡突兀空留後世名

讀書

吾生本寒儒老尚把書卷眼力雖已疲心意殊未倦正經首唐

虞偽說起秦漢篇章異句讀解詁及箋傳是非自相攻去取在

勇斷初如兩軍一作兵交乘勝方一作多酣戰當其旗鼓催不覺人

馬汗至哉天下樂終日在一作書案念昔始從師力學希仕宦

豈敢取聲名惟期脫貧賤忘食日已脯然薪夜侵旦謂言得志

一作意後便可焚筆硯少償辛苦時惟事寢與飯歲月不我留一

生今過半中間嘗忝竊內外職文翰官榮日清近廩給亦豐羨

人情慎所習醜毒比安宴漸追時俗流稍稍學營辦盃盤窮水

陸賓客羅俊彥自從中年來人事攻百箭非惟職有憂亦自老

可歎形骸苦衰病心志亦退懦前時可喜事閉眼不欲見惟尋
舊讀書簡編一作編簡多朽斷古人重溫故官事幸有間乃知讀書

勤其樂固無限少而千祿利老用忘憂患又知物貴久至寶見

百鍊紛華暫時好俯仰浮雲散淡泊味愈長始終殊不變何時

乞殘骸萬一免罪譴買書載舟歸築室一作屋穎水岸平生頗論

述銓次加點竄庶幾垂後世不默死芻豢信哉蠹書魚韓子語

非訕

鷓鴣詞效王建

龍樓鳳闕一作閣鬱崢嶸深宮不聞更漏聲紅紗蠟燭愁夜短綠

窗鷓鴣催天明一聲兩聲人漸起金井轆轤聞汲水三聲四聲

促嚴粧紅靴玉帶奉君王萬年枝軟風露溼上下枝間聲轉急

南衙促仗三衛列九門放鑰千官入重城禁籟鎖池臺此鳥飛

從何處來君不見潁河東岸村一作春陂澗山禽野鳥常一作時嘲

啮田家惟聽夏雞聲鷓鴣京西村人謂之夏雞夜夜籠頭耕曉月可憐此樂

獨吾知眷戀君恩今白髮

初食鷄頭有感一本無有感字

六月京師暑雨多夜夜南風吹芙蓉凝祥池鎖會靈園僕射荒

陂安可擬京師賣五岳宮及鄭州鷄頭最為佳爭先園客採新苞剖蚌得珠從海

底都城百物貴新鮮厥價難酬與珠比金盤磊落何所薦滑臺

撥醅如玉醴自慙竊食萬錢厨滿口飄浮嗟病齒卻思年少在

江湖野艇高歌菱苳裏香新味全手自摘玉潔沙磨軟還美一

瓢固不羨五鼎萬事適情為可喜何時遂一作益買穎東田歸去

結茅臨野水

雙井茶

西江水清江石老石上生茶如鳳爪窮臘不寒春氣早雙井芽

生先百草白毛囊以紅碧紗十斤茶養一兩芽長安富貴五侯

家一啜猶須三日誇寶雲日注非不精爭新棄舊世人情豈知

君子有常德至寶不隨時變易君不見建溪龍鳳團不改舊時

香味色

贈李士寧

蜀狂士寧者不邪亦不正混世使人疑詭譎非一行平生不把

筆對酒時高詠初如不著意語出多奇勁傾財解人難去不道

名姓一無上金一作千錢買酒醉高樓明月空牀一作清風眠不醒一

身四海即為家獨行萬里聊乘興既不採藥賣都市又不點石

化黃金進不千公卿退不隱山林與之游者一本四字但愛其

人而莫一作不見其術安知其心吾聞有道之士游心太虛逍遙

出入一本二句止常一作動與道俱故能入火不熱一作入水不

濡嘗聞其語一作吾雖而未見其人也豈斯人之徒與不然言

不純師行不純德一作表而一本無滑稽玩一作傲世其東方朔之

流乎

明妃小引

漢宮諸女嚴粧罷共送明妃溝水頭溝上水聲來不斷花隨水
去不回流上馬卽知無返日不須出塞始堪愁

感事四首

老者覺時速閒人知日長日月本無情人心有閒忙努力取功
名斷碑埋路傍逍遙林下土邱壠亦相望長生旣無藥濁酒且
盈觴

空山一道士辛苦學延齡一旦隨物化反言仙已成開墳見空
棺謂已超青冥尸一作解如蛇蟬換骨蛻其形旣云須變化何
不任死生

仙境不可到誰知仙有無或乘九班虬或駕五雲車朝倚扶桑
枝暮遊崑崙墟往來幾萬里誰復遇諸塗富貴不還鄉安事富
貴與神仙人不見魑魅與爲徒人生不免死魂魄入幽都仙者
得長生又云超太虛等爲不在世與鬼亦何殊得仙猶若此何
况不得乎寄謝山中人辛勤一何愚

莫笑學仙人山中苦岑寂試看青松鶴何似朱門客朱門炙手
熱來者無時息何嘗問寒暑豈暇謀寢食彊顏悅憎怨擇語防
仇敵衆欲苦無厭有求期必獲敢辭一身勞豈塞天下責風波
卒然起禍患藏不測神仙雖杳茫富貴竟何得

新春有感寄常夷甫

國朝文獻通考卷九
余生本羈孤自少已非壯今而老且病何用苦惆悵誤蒙三聖
知貪得過其量恩私未知報心志已凋喪軒裳德不稱徒自取
譏謗豈若常夫子一瓢安陋巷身雖草莽間名在朝廷上惟余
服德義久已慕恬曠矧亦有吾廬東西正相望不須駕柴車自
可策藜杖坐驚顏鬢日摧頽及取新春歸去來共載一舟浮野
水焦陂四面百花開

昇天檜

青牛西出關老聃始著五千言白鹿去昇天爾來忽已三千年
當時遺迹至今在隱起蒼檜猶依然惟能乘變化所以爲神仙
驅鸞駕鶴須臾間飄忽不見如雲煙奈何此鹿起平地更假草
木相攀緣乃知神仙事茫昧真偽莫究徒自傳雪霜不改終古
色風雨有聲當夏寒境清物老自可愛何必詭怪窮根源

憶焦陂

一本無憶字
注汝陰作

焦陂荷花照水光未到十里聞花香焦陂八月新酒熟秋水魚
肥鱸如玉清河兩岸柳鳴蟬直到焦陂不下船笑向漁翁酒家
保金龜可解不須錢明日君恩許歸去白頭酣詠太平年

贈許道人

洛城三月亂鶯飛潁陽山中花發時往來車馬遊山客貪看山
花踏山石紫雲仙洞鎖雲深洞中有人人不識飄飄許子旌陽
後道骨仙風本仙胄多年洗耳避世喧獨臥寒巖聽山溜至人

無心不算心無心自得無窮壽忽來顧我何慙歎笑我白髮老
紅塵子歸爲築巖前室待我明年乞得身

送龍茶與許道人

潁陽道士青霞客來似浮雲去無蹟夜朝北斗太清一作虛壇不
道姓名人不識我有龍團古蒼璧九龍泉深一百尺憑君汲井
試烹之不是人間香味色

馴鹿

朝渴飲清池暮飽眠深柵慙媿主人恩自非殺身難報德主人
施恩不待報哀爾胡爲網羅獲南山藹藹動春陽吾欲縱爾山
之傍巖崖雪盡飛泉溜澗谷風吹百草香飲泉齧草當遠去山

後山前射生戶

畱題齊州舜泉

岸有時而爲谷海有時而爲田虞舜已歿三千年耕田浚井雖
鄙事至今遺迹存依然歷山之下有寒泉向此號泣于旻天無
情草木亦改色山川慘淡生雲煙一朝垂衣正南向臯夔稷契
來聯翩功高德大被萬世今人過此猶畱連齊州太守政之暇
鑿渠開沼疏清漣遊車擊轂惟恐後衆卉亂發如爭先豈徒邦
人知樂此行客亦爲畱征軒

山齋戲書絕句二首

蜜脾未滿蜂採花麥壠已深鳩喚一作雨正是山齋睡足時不

覺花間日亭午

經春老病不出門坐見羣芳爛如雪正當年少惜花時日日春風吹石裂

嘲少年惜花

紛紛紅藥落泥沙少年何用苦咨嗟春風自是無情物肯爲汝惜無情花今年花落明年好但見花開人自老人老不復少花開還更一作復新使花如解語應笑惜花人

出郊見田家蠶麥已成慨然有感

誰謂田家苦田家樂有時車昌遮切鳴緜白繭麥熟疇黃鷗田家此樂幾人知幸獨知之未許歸逢時得寵已逾分報國無能徒

爾爲收取玉堂揮翰手卻尋南畝把鋤犁

射生戶

子初至州獵戶有獻狼豹者

射生戶前日獻一豹今日獻一狼豹因傷我牛狼因食我羊狼豹誠爲害人物縣官賞之縑五疋射生戶持縑歸爲人除害固可賞貪功趨利爾勿爲強弓毒矢無妄發恐爾不識麒麟兒

戲石唐山隱者

石唐仙室紫雲深潁陽真人此算心真人已去升寥廓歲歲巖花自開落我昔曾爲洛陽客偶向巖前坐盤石四字丹書萬仞巖神清之洞鎖樓臺雲深路絕無人到鸞鶴今應待我來

居士集卷第九終

居士集卷第十 全集十

一律詩六十首

送王汲宰藍田

喧喧動車馬共出古都門
落日催行客東風吹酒尊
樹搖秦田綠花入輞川
繁若遇西來旅時應問

一作望故園

徽安門曉望

都門收宿霧佳氣鬱葱葱
曉日寒川上青山白霧

一作露中樓臺

萬瓦合車馬九衢通恨乏
登高賦徒知京邑雄

送孟都官知蜀州

國朝文忠公全集 卷一
名郎出粉闥佳郡古關西幾驛秦亭盡千山蜀鳥啼朱輪照耕
野綠芋覆秋畦向闕應東望雲深隴樹迷

南征回京至界上驛先呈城中諸友

朝雲來少室日暮向箕山本以無心出寧隨倦客還春歸伊水
綠花晚洛橋閒誰有餘尊酒相期一解顏

逸老亭

一本注彭城
公白蓮庄

上相此忘榮怡然物外情池光開小幌山翠入重城野鳥窺華
袞春壺勞耦耕枕前雙鴈沒雨外一川晴解組金龜重調琴赤
鯉驚雖懷安石趣豈不爲一作念蒼生

廣愛寺

都人布金地紺宇巋然存山氣蒸經閣鐘聲出國門老杉春自
綠古壁雨先昏應有幽人屐來畱石蘚痕

弔黃學士三首

名鑑

麗正讎書久蘭臺約史成迎親就江水厭直出承明世德無雙
譽詩豪第一評風流今頓盡響像憶平生

沈約多清瘦文園仍病瘠共疑天上召更欲水邊招金馬人相
弔長沙物易妖秋風吹越樹歸旄自飄飄

自古蘭衰早因令蕙歎深書遺茂陵稟病作越鄉吟蒿里無春
色闔山蔽夕陰空嗟埋玉樹齋志永沈沈

雨後獨行洛北

北闕望南山明嵐雜紫煙歸雲向嵩嶺殘雨過伊川樹繞芳隄
外橋橫落照前依依半荒苑行處獨聞蟬

陪府中諸官遊城南

一本注
西京作

一雨郊圻迴新秋榆棗繁田荒溪溜入禾熟雀聲喧燒出空槎
腹人耕廢廟垣閒追向城客落日隱高原

智蟾上人遊南岳

終日念雲壑南歸心浩然青山入楚路白水望湖田野渡惟浮
鉢山家少施錢到時春尚早收茗綠巖前

送左殿丞

一作
直

入蜀

傳聞蜀道難行客若登天紫竹深無路黃花忽見川聞禽嗟異

域問俗訪耆年欲識京都遠惟應望日邊

秋郊曉行

一作
望

寒郊桑柘稀秋色曉依依野燒侵河斷山鴉向日飛行歌採樵

去荷鋪刈

一作
治

田歸秫

一作
村

酒家家熟相邀白竹扉

被牒行縣因書所見呈寮友

周禮恤凶荒輶車出四方土龍朝祀雨田火夜驅蝗木落孤村
迴原高百草黃亂鷗鳴古堞寒雀聚空倉桑野人行鱸魚陂鳥
下梁晚煙茅店月初日棗林霜連戶催寒候叢祠禱歲穰不妨
行覽物山水正蒼茫

緱氏縣作

國朝文忠公全集 卷十
亭候徹郊畿人家嶺坂西青山臨古縣綠竹繞寒溪道上行收
穗桑間晚漑畦東臯有深趣便擬卜幽棲

又行次作

秋色滿郊原人行禾黍間雉飛橫斷澗燒響入空山野水蒼煙
起平林夕鳥還嵩嵐久不見寒碧更孱顏

送梅秀才歸宣城

從學方年少還家罄橐金久爲江北客能作洛生吟罷亞霜前
稻鉤轉竹上禽歸帆何處落應拂野梅林

鞏縣陪祭獻懿二后回孝義橋道中作

落日漢陵道初寒慘暮飈遙看山口火暗渡洛川橋不見新園

樹空聞引葬簫林鴟棲已定猶

一作獨此倦征鑣

送謝學士歸闕

供帳拂朝煙征鞍去莫攀人醒風外酒馬度雪中關舊府誰同
在新年獨未還遙應行路者偏識綵衣斑

河南王尉西齋

寒齋日蕭索天外做簷楹竹雪晴猶覆山窗夜自明禽歸窺野
客雲去入重城欲就陶潛飲應須載酒行

張主簿東齋

官舍掩寒扉聊同隱者棲溪流穿竹過

一作迴

山鳥入城啼賓主

高談勝心冥外物齊惟應朝枕夢長厭隔隣

一作雞林

留守相公禱雨九龍祠應時獲澍呈府中同寮

古木鬱沈沈祠亭相袞臨雷驅山外響雲結日邊陰霖霖來初
合依微勢稍深土膏潛動脈野氣欲成霖隴上連雲色田家擊
壤音明光應奏瑞黃屋正焦心帝邑山川美離宮萬瓦森廢溝
鳴故苑紅蘼發青林南畝猶須勸餘春尙可尋應容後車一作車後
客時作洛生吟

春日獨遊上林院後亭見櫻桃花奉寄希深聖俞仍酬遞
中見寄之什

昔日尋春地今來感歲華人行已荒徑花發半枯槎高榭林端
出殘陽水外斜聊持一尊酒徒倚憶天涯

獨至香山憶謝學士

一作希深

伊水弄春沙山臨水上斜曾爲謝公客徧一作徧入梵王家陰澗
初生草春崑自落花卻尋題石處歲月已堪嗟

春晚同應之偶至普明寺小飲作

偶來林下徑共酌竹間亭積雨添方一作芳沼殘花點綠萍野陰
侵席潤芳氣襲人醒禽鳥休驚顧都忘兀爾形

黃河八韻寄呈聖俞

河水激箭險誰言航葦遊堅冰馳馬渡伏浪卷沙流樹落新摧
岸湍驚忽改洲鑿龍時退鯉漲潦不分牛萬里通槎漢千帆下
漕舟怨歌今罷築故道失難求灘急風逾響川寒霧不收詎能

窮禹跡空欲問張侯

和應之同年兄秋日雨中登廣愛寺閣寄梅聖俞

經年都洛與君交共許詩中思最豪舊社更誰能擁鼻新秋有
客獨登高徑蘭欲謝悲零露離菊空開乏凍醪縱使河陽花滿
縣亦應畱滯感潘毛

晚過水北

寒川消積雪凍浦漸通流日暮人歸盡沙禽上釣舟

罷官西京回寄河南張主簿

歸客下三川孤郵暫解鞍鳥聲催暮急山氣欲晴寒已作愁霖
詠猶懷祖帳歡更聞溪溜響疑是石樓灘

寄西京張法曹

幕府三年客羣居幾日親初分闕一作關口路猶見洛陽人壠麥
晴將秀田花晚自春向家行漸近豈復倦征輪

離彭婆值雨投臨汝驛回寄張九屯田司錄

投館野花邊羸驂晚不前山橋斷行路溪雨漲春田樹冷無棲
鳥村深起暮煙洛陽山已盡休更望伊川

朱家曲一本有并引字

朱家曲自許縣北門上赤坂岡分道西行入小路三十里有
村市臨古河商賈之販京師者舟車皆會此居民繁雜宛然
如江鄉予以事偶至此宿旅邸明日遂赴京師

行人傍衰柳路向古河窮桑柘田疇美漁商市井通薪歌晚入
浦舟子夜乘風旅舍孤煙外天京王氣中山川許國近風俗楚
鄉同宿客雞鳴起驅車猶更東

行至樞澗作

霜後葉初鳴羸驂遶澗行川原人遠近禾黍日清明病質驚殘
歲歸塗厭一作壓暮程空林聚寒雀疑已作春聲

送謝希深學士北使

漢使入幽燕風煙兩國間山河持節遠亭障出疆閒征馬聞笳
躍離弓向月彎禦寒低便面贈客解刀環鼓角雲中壘牛羊雪
外山穹廬鳴朔吹凍酒發一作啟朱顏塞草生侵磧春榆綠滿關

應須鴈北嚮方值使南還

送賈推官赴絳州

白雲汾水上人北鴈南飛行李山川遠風霜草木腓郡齋賓榻
掛幕府羽書稀最有題輿客偏思玉塵揮

送張如京知安肅軍

相逢舊從事新命忽臨戎界上山河壯軍中鼓角雄朔風馳駿
馬塞雪射驚鴻試取封侯印何如筆硯功

送威勝軍張判官

北地不知春惟看榆葉新岑牟多武士玉塵重嘉賓野燐一作燒
驚行客烽煙入遠一作暮塵繫書沙上鴈時寄日邊人

送同年史襄之武功尉

久作遊邊客常悲入塞笳今茲一尉遠猶困折腰嗟白馬關中
道青天一作煙棧外家過秦應弔古惟有故山斜

送祝熙載之東陽主簿

吳江通海浦畫舸候潮歸疊鼓山間響高帆鳥外飛孤城秋枕
水千室夜鳴機試問還家客遼東今是非

鄭十一先輩赴四明幕

一本注初授洋川辭不行

梁漢褒斜險夫君畏遠遊家臨越山下帆入海潮頭岸柳行稍
盡江葦歸漸秋故鄉看衣錦寧羨李膺舟

送丁元珍峽州判官

一作送朱處仁

為客久南方西游更異鄉江通蜀國遠山閉楚祠荒油幕無軍
事清猿斷客腸惟應陪主諾不費日飛觴

送楚建中潁州法曹

冠蓋盛西京當年相府榮曾陪鹿鳴宴一作偏識洛陽生共歎
長沙謫空存許劭評堪嗟桃李樹何日見陰成

送王尚恭隰州幕

去國初游宦從軍苦寂寥愁雲帶一作傍城起畫角向山飄秋勁
方馳馬春寒正襲貂遙知為客恨應賴酒盃消

送王尚詰三原尉

初仕便西轅驪駒兩佩環山河識天府風雨度函關桑柘千疇

富人煙萬井閒欲為京洛詠應苦簿書間

送餘姚陳寺丞最

銅墨佩腰間中流望若一作仙鳴蟬汴河柳畫鷁越鄉船下瀨

逢江鴈瞻氛落海鳶山川仍客思盡入隱侯篇

送廖八下第歸衡山

曾作關中客嘗窺百二疆自言秦隴一作嶺水能斷楚人腸失意

倦京國羈愁成鬢霜何如伴征鴈日日向衡陽

夏侯彥濟武陟尉

風煙地接懷井邑富田垓河近聞冰坼山高見雨來官閒同小

隱酒美足銜盃好去東籬菊迎霜正欲開

遠山

山色無遠近看山終日行峰巒隨處改行客不知名

宋宣獻公挽詞三首

望繫朝廷重文推天下工清名畏楊綰故事問胡公物議垂為

相風流頓已窮仁言博一作博哉利獻替有遺忠

識度推明哲風猷藹縉紳何言止中壽遂不秉洪鈞翰墨時爭

寶詞章晚愈新哭哀文伯母悲感路傍人

結髮一作逢明主馳聲著兩朝奠楹先有夢升屋豈能招贈服

三公哀兼榮七葉貂春風笳鼓咽松柏助蕭蕭

初出真州泛大江作

孤舟日日去無窮行色蒼茫杳靄中山浦轉帆迷向背夜江看
斗辨西東滂田漸下雲間鴈霜日初丹水上楓蓴菜鱸魚方有
味遠來猶喜及秋風

江行贈鴈

雲間征鴈水間棲贈繳方多羽翼微歲晚江湖同是客莫辭伴
我更南飛

松門

已下五首一本
屬夷陵九詠

島嶼松門數里長懸崖對起碧峯雙可憐勝境

一作景

當窮塞翻

使畱

一作流

人戀此邦亂石驚灘喧醉枕淺沙明月入船窗因遊

始覺南來遠行盡荆江見蜀江

下牢津

依依下牢口古戍鬱嵯峨入峽江漸曲轉灘山更多白沙飛白

鳥青障

一作嶂

合青蘿遷客初

一作嘗
作多

經此愁詞作楚歌

龍溪

潺潺出亂峯演漾綠蘿風淺瀨寒難涉危槎路不通朝雲起潭
側飛雨徧江中更欲尋源去

一作上

山深不可窮

勞停驛

孤舟轉山曲豁爾見平川樹杪帆初落峯頭月正圓荒煙幾家
聚瘦野一刀田行客愁明發驚灘鳥道前

黃溪夜泊

楚人自古登臨恨暫到愁腸已九回萬樹蒼煙三峽暗滿川明
月一猿哀非鄉况復驚殘歲慰客偏宜把酒盃行見江山一作山河
且吟詠不因遷謫豈能來

望州坡

聞說夷陵人易愁共言遷客不堪遊崎嶇幾日山行倦卻喜坡
頭見峽州

居士集卷第十終

居士集卷第十一 全集十一

二十七世孫衡校刊

律詩五十七首

初至夷陵答蘇子美見寄

三峽倚岩堯同

一作南

遷地最遙物華雖可愛鄉思獨無聊江水

流清嶂猿聲在碧霄野筍抽夏笋叢橘長春條未臘梅先發經

霜葉不凋江雲愁

一作懸

蔽日山霧晦連朝斫谷爭收漆梯林鬪

摘椒巴賓船賈集

一作巴江

蠻市酒旗招時節同荆俗民風載

楚謠俚歌成調笑探

一作搽

鬼聚喧囂

夷陵之俗多淫奔又好祠祭每遇祠時里民數百共

餞其餘里語謂之探鬼因此多成鬪訟

得罪宜投裔包羞分折腰光陰催晏歲牢

落慘驚颺白髮新年出朱顏異域銷縣樓朝見處官舍夜聞鴉
寄信無秋鴈思歸望斗杓須知千里夢長繞洛川橋

冬後三日陪丁元珍遊東山寺

幕府文書日已希清尊歲晏喜相攜寒山帶郭穿松路瘦馬尋
春踏雪泥翠蘚蒼崖森古木綠蘿盤石暗深溪爲貪賞物來猶
早迎臘梅花吐未齊

送前巫山宰吳殿丞

字照鄰

俊域當年仰下風天涯今日一尊同高文落筆妙天下清論揮
犀服坐中江上掛帆明月峽雲間謁帝紫微宮山城寂寞少嘉
客喜見瓊枝

一作林慰病翁

龍興寺小飲呈表臣元珍

平日相從樂會文博臬壺馬占朋分罰籌多似昆陽矢酒令嚴
於細柳軍蔽日雪雲猶黶黶欲晴花氣漸氤氳一尊萬事皆豪
末螺贏螟蛉豈足云

縣舍不種花惟栽楠木冬青茶竹之類因戲書七言四韻
結綬當年仕兩京自憐年少體猶輕伊川洛浦尋芳徧魏紫姚
黃照眼明客思病來生白髮山城春至少紅英芳叢密葉聊須
種猶得蕭蕭聽雨聲

至喜

一作虛白

堂新開北軒手植楠木兩株走筆呈元珍表臣
爲憐碧砌宜佳樹自斲蒼苔選綠叢不向芳菲趁

一作開落直

須霜雪見青葱披條泣轉清晨露響葉蕭騷半夜風時掃濃陰
北窗下一枰閒且伴衰翁

戲答元珍

一本下云花時久雨之什

春風疑不到天涯二月山城未見花殘雪壓枝猶有橘凍雷驚
筍欲抽芽夜聞歸鴈生鄉思病人新年一作鳥聲漸變知感物
華曾是洛陽花下客野芳雖晚不須嗟

初晴獨遊東山寺五言六韻

日暖東山去松門數里斜山林隱者趣鐘鼓梵王家地僻遲春
節風晴變一作物華雲光漸容與鳥哢已交加冰下泉初動煙
中茗未芽自憐多病客來探欲開花

夷陵歲暮書事呈元珍表臣

一本作元珍判官表臣推官

蕭條雞犬亂山中時節崢嶸忽

一作歲

已窮遊女髻鬟風俗古野

巫歌舞歲年豐

夷陵俗樸陋惟歲暮祭鬼則男女數百相從而樂飲婦女競為野服以相遊嬉夷陵俗下一

本有古字

平時都邑今為陋敵國江山昔最雄

三國時吳蜀戰爭於此

荆楚先

賢多勝迹不辭攜酒問鄰翁

處士何參居縣舍西好學多知荆楚故事

夷陵書事寄謝三舍人

一作代書寄舍人三丈

春秋楚國西偏境陸羽茶經第一州紫箬青林長蔽日綠叢紅

橘最宜秋道塗處險人多負邑屋臨江俗善泅獵市漁

一作鹽魚

朝暫合淫祠簫鼓歲無休風鳴燒入空城響雨惡江崩斷岸流

月出行歌聞調笑花開啼鳥亂鉤輅

一本有訟庭畫地通人語邑政觀風間俚謳土俗雖

輕人自樂山川信 黃牛峽口經新歲白玉京中夢舊遊曾是洛
美客偏愁四句

陽花下客欲誇風物向君羞

戲一作寄贈丁判官

西陵江口折寒梅爭勸行人把一作酒盃須信春風無遠近維

舟處處有花開

寄梅聖俞一本注夷陵作

青一作春山四顧亂無涯雞犬蕭條數百家楚俗歲時多雜鬼蠻

鄉一作風言語不通華繞城江急舟難泊當縣山高日易斜擊鼓

踏歌成夜市邀龜下雨趁燒一作春畚式車切叢林白晝飛妖鳥庭

砌非時見異花惟有山川為勝絕寄人堪作畫圖誇

離峽州後回寄元珍表臣一本作元珍判官表臣推官

經年遷謫厭荆蠻惟有江山興未闌醉裏人歸青草渡夢中船

下武牙灘野花零落一作亂風前亂一作舞飛雨蕭條江上寒荻笋

時魚方有味恨無佳客共盃盤

再至西都一作寄謝希深

伊川不到十年間魚鳥今應怪我一作我自還浪得浮名銷壯節羞

將一作看白髮見一作對青山野花向客開如一作異花向我情猶笑芳草畱

人意自閒卻到一作行至謝公題壁處向風清淚獨一作臨風潺潺

過錢文僖公白蓮莊

城南車馬地行客過徘徊野水寒猶入餘花晚自開命賓會授

簡開府最多才今日西州路何人更獨來

謝公挽詞三首

始見行春旆俄聞引壘簫笑言猶在耳魂魄遂難招天象奎星
暗辭林玉樹朔風吹霰雪銘旆共飄飄

前日賓齋宴今晨奠柩觴死生公自達存歿世徒傷舊國難歸
壘餘貲不給喪平生公輔志所可得在文章

樂事與良辰平生愛洛濱泉臺一閉夜蒿里不知春翰墨猶新
澤圖書已素塵堪憐寢門哭猶有舊時賓

愁牛嶺

邦人盡一作說畏愁牛一作不獨牛愁我亦愁終日下一作山

行百轉卻從山腳望山頭

寄子山待制二絕

一本後篇作別
鎮陽寄沈待制

畱滯西山獨可嗟殘春過盡始還家落花縱有那堪醉

一作看
一作愛

何況歸時無落花

聞君屢醉賞紅英落盡殘花酒未醒嗟我落花無分看莫嫌狼

藉掃中庭

寄秦州田元均

由一作來邊將用儒臣坐以威名撫漢軍萬馬不嘶聽號令諸

蕃無事著一作耕耘夢回夜帳聞羌笛詩就高樓對隴一作暮雲

莫忘一作鎮陽遺愛在一作北潭桃李正氛氲一作春深桃

次易之詩次公集
卷十一
居士集

送沈待制邈陝西都運

幾歲瘡痍近息兵，經營方喜得時英。
從來漢粟勞飛輓，當使秦人自戰耕。
道左旌旗諸將列，馬前弓一作冠劍六蕃迎。
知君材力多閒暇，賸聽陽關醉後聲。

樂城遇風效韓孟聯句體

歲暮氛霾惡，冬餘氣候爭。
吹噓回煖律，號令發新正。
遠響來猶漸，狂奔勢益橫。
頽城鏖戰鼓，掠野過陰兵。
掃蕩無餘靄，顛摧鮮立莖。
五山搖岌業，九鼎沸煎烹。
玉石焚岡裂，波濤卷海傾。
遙聽午合市，爭呼夜驚營。
慘極雲無色，陰窮火自生。
電鞭時若劃，雷軸助喧轟。
孔竅千聲出，陰幽百怪呈。
狐妖憑蒼莽，鬼焰走青熒。

奮怒神憎悚，中休耳暫清。
胡兵占月暈，江客候鼉鳴。
飄葉千艘失，飛空萬瓦輕。
獵豪添馬健，舶穩想帆征。
畏壓頻移席，陰祈屢整纓。
凍消初醒蟄，枯活欲抽萌。
病體愁山館，春寒賴酒銷。
鷄號天地白，登壘看晴明。

過中渡二首

中渡橋邊十里堤，寒蟬一作梅落盡柳條衰。
年年塞下春風晚，誰見輕黃弄色時。

得歸還自歎淹留，中渡橋邊柳拂頭。
記得來時橋上過，斷冰殘雪滿河流。

自河北貶滁州初入汴河聞鴈

陽城淀裏新來鴈趁伴南飛逐一作何事越船野岸柳黃霜正

白五更驚破客愁眠

自勉

引水澆花不厭勤便須已有鎮陽春官居處處如郵傳誰得三年作主人

席上送劉都官

都城車馬日喧喧雖有離歌不慘顏豈似客亭臨野岸暫畱尊酒對青山天街樹綠騰歸騎玉殿霜清綴曉班莫忘西亭曾醉處月明風溜響潺潺

寄劉都官

別後山光寒更綠秋深酒美色仍清繞亭黃菊同君種獨對殘芳醉不成

書王元之畫像側

在琅瑯山

偶然來繼前賢迹信矣皆如昔日言諸縣豐登少公事一家飽暖荷君恩想公風采常如在顧我文章不足論名姓已光青史上壁間容貌任塵昏公貶滁州謝上表云諸縣豐登苦無公事一家飽暖共荷君恩

送京西提刑趙學士

題輿嘗屈佐畱京攬轡今行一作來按屬城楚館尚看淮月色嵩

雲應過虎關迎春寒酒力風中醒梅香雪後清野俗經年

畱惠愛莫辭臨別醉冠傾

寄題宜城縣射亭

作邑三年事事勤宜城風物自君新已能為政畱遺愛何必栽
花遺後人藹若芝蘭芳可襲温如金玉粹而純友朋欣慕自如
此何況斯民父母親

豐樂亭遊春三首

綠樹交加山

一作新
陰野

鳥啼晴風蕩漾落

一作晚晴
斜日雜

花飛鳥歌花

舞太守醉明日

一作
月

酒醒春已

一作
色

歸

春雲淡淡日輝輝草惹行襟絮拂衣行到亭西逢太守盃輿酌
酌插花歸

紅樹青山日欲斜長郊草色綠無涯遊人不管春將老

一作
盡來

往

一作
空

亭前踏落花

謝判官幽谷種花

淺深紅白宜相間先後仍須次第栽我欲四時攜酒去莫教

日不花開

畫眉鳥

一作郡齋
聞百舌

百轉千聲隨

一作
任

意移山花紅紫樹高低始知鎖向金籠聽不

及林間自在啼

懷嵩樓新開南軒與郡僚小飲

繞郭雲煙

一作閣
煙雲

匝幾重昔人曾此感懷嵩霜林落後山爭出

野菊開時酒正濃解帶西風飄畫角倚闌斜日照青松會須乘

醉攜嘉客踏雪來看羣玉峯

送張生

一別相逢十七春頽顏衰髮互相詢江湖我再為遷客道路君

猶困旅人老驥骨奇心尚壯青松歲久色逾新山城寂寞難為

禮一作客濁酒無辭舉爵頻

田家

綠桑高下映平川賽罷田神笑語喧林外鳴鳩春雨歇屋頭初

日杏花繁

別滁

花光濃爛柳輕明酌酒花前送我行我亦且一作抵如常日醉莫

教絃管作離聲

答謝判官獨遊幽谷見寄

聞道西亭偶獨登悵然懷我未忘情新花自向遊人笑啼鳥猶

為舊日聲因拂醉題詩句在應憐手種樹陰成須知別後無由

到莫厭頻攜野客行

招許主客

欲將何物招嘉客惟有新秋一味涼更一作靜掃廣庭寬一作百

畝少容明月放一作吐清光樓頭破鑑看將滿甕面浮蛆撥已香

仍一作更約多為詩準備共防梅老敵難當

金鳳花

憶繞朱闌手一作喜自栽綠一作繁叢高下幾番開中庭雨過無人迹狼藉深紅點綠苔

鷺鷥

風格孤高塵外物性情閒暇水邊身盡日獨行溪淺處青苔白石見纖鱗

野鵲

鮮鮮毛羽耀朝輝紅粉墻頭綠樹枝日暖風輕言語軟應將喜報主人知

木芙蓉

種處雪消春始動開時霜落鴈初過誰栽金菊叢相近織出新

番蜀錦窠

樵者

雲際依依認舊林斷崖荒磴路難尋西山望見朝來雨南澗歸時渡處深

詠雪

至日陽初復豐年瑞遠臻飄飄初未積散漫忽無垠萬木青煙滅千門日晝新往來衝更合高下著何勻望好登長榭平堪走畫輪馬寒毛縮蝟弓勁力添鈞客醉看成眩兒嬌一作驕咀且顰

虛堂明永夜高閣照清晨樹石詩翁對川原獵騎陳凍狐迷舊穴飢雀噪空囷此土偏宜稼而子濫長人應須待和暖載酒共

行春

送楊先輩登第還家

解榻方欣待雋英掛帆千里忽南征錦衣白日還家樂鶴髮高堂獻壽榮殘雪楚天寒料峭春風淮水浪崢嶸知君歸意先飛鳥莫惜停舟酒屢傾一作餞行

初至潁州西湖

一作到潁治事之明日行西湖上

種瑞蓮黃楊

一作因與郡官小酌

其上聊書所見

寄淮南轉運呂度支發運許主客

平湖十頃碧琉璃四面清陰乍合時桺絮已將春去遠海棠應

恨我來遲啼

一作鳴

禽似與遊人語明

一本作好

月閒撐野

一作小

艇隨

每到最佳堪樂處卻思君共把芳卮

三橋詩

皇祐元年新作三橋而名之既而又為之詩

朱闌明綠水古桺照斜陽何處偏宜望清漣對女郎

清漣閣名後改作去

思堂

右宜遠

鳴騶入遠樹飛蓋渡長橋水濶鷺雙起波明魚自跳

右飛蓋

輕舟轉孤嶼幽浦漾平波回看望佳處歸路逐漁歌

右望佳

答通判呂大博

千頃芙蓉蓋水平

郡治荷花四望極目

揚州太守舊多情畫盆圍處花光

合予嘗採蓮千朶插以畫盆圍繞坐席紅袖傳來酒令行又嘗命坐客傳花人摘一葉葉盡處飲以為酒
令舞踏落暉畱醉客歌遲檀板換新聲如今寂寞西湖上雨後無人看落英

祈雨曉過湖上

清晨驅馬思悠然渺渺平湖碧玉田曉日未昇先起霧綠陰一本
作初合自生煙身閒始覺時光好春去猶餘物色妍更待四郊甘雨足相隨簫鼓樂豐年

居士集卷第十一終

居士集卷第十二 全集十二

二十七世孫衡校刊

律詩五十六首

送一作寄謝中舍二首

滁南一作陽幽谷抱山斜我鑿清泉子種花故事已傳遺一作畱傳父

老說世人今一作分作畫圖誇金閨引籍子方壯白髮盈簪我可

嗟試問弦歌為縣政一作意何如尊俎樂無涯

喜聞嘉譽藹淮壻又看吳一作送征帆解畫船隴畝遺民談舊政江

山餘思入新篇人生白首一作憂傷白髮吾今爾仕路一作宦青雲子勉

旃舉棹南風吹酒醒離觴莫惜少一作更畱連

酬張器判官泛溪

園林初夏有清香人意乘閒味愈長日暖魚跳波面靜風輕鳥
語樹陰涼野亭飛蓋臨芳草曲渚迴舟帶夕陽所得平時爲郡
樂况多嘉客共銜觴

西園石榴盛開

荒臺野徑共躋攀正見榴花出短垣綠葉晚鶯啼處密紅房初
日照時繁最憐夏景鋪珍簞尤愛晴香入睡軒乘興便當攜酒
去不須旌騎擁車轅

西湖戲作示同遊者

一作初
泛西湖

菡萏香清

一作綠
菱紅蓮

畫舸浮使君寧

一作
不

復憶揚州都將二十四

橋月換得西湖十頃秋

夢中作

夜涼吹笛千山月路暗迷人百種花棋罷不知人換世酒闌無
奈客思家

秀才歐世英惠然見訪於其還也聊以贈之

相逢十年舊暫喜一尊同昔日青衫令今爲白髮翁俟時君子

一作
處求士有司公况子之才美焉能久困窮

送楊君之任永康

劍峯雲棧未嘗行圖畫會看已可驚險若登天懸鳥道下臨無
地瀉江聲折腰莫以微官恥爲政須通異俗情况子多才兼美

行薦章期即達承明

紀德陳情上致政太傅杜相公二首

一云與丞相太傅杜公唱和一十二首自

此而

儉節清名世絕倫坐令風俗可還淳
貌先年老因憂國事與心違始乞身
四海儀刑瞻舊德一尊談笑作閒人
鈴齋幸得親師席東向時容問治民

事國一心勤以

一作且

瘁還家五福壽而康風波已出憑忠信松

柏難凋耐雪霜昔日青衫遇知己
今來白首再升堂里門每入從千騎
賓主俱榮道路光

太傅杜相公索聚星堂詩謹成

一本云太傅相公寵答佳篇仍索拙詩副本謹吟成

四韻以敘鄙懷

楚肆固知難街玉邱門安敢輒論詩
藏之十襲真無用報以雙

金豈所

一作自

宜已恨語言多猥况因盃杓

一作酌

正淋漓願投

几格資哈噓欲展須於欲睡時

和太傅杜相公寵示之作

一本屢賜嘉篇褒惜謹依元韻聊述媿佩之意

平生孤拙荷公知敢向公前自銜詩
憂患飄流誠已甚文辭衰落固其宜
非高僅比巴音下少味還同魯酒漓
兩辱嘉篇承為寶豈惟榮耀詫當時

太傅杜相公有答兗州待制之句其卒章云獨無風雅可

流傳因輒成

一本作因成四韻

南都已見成新集東魯休嗟未作詩霖雨曾為天下福甘棠何
止郡人思元劉事業時無取姚宋篇章世不知二美惟公所兼
有後生何者欲攀追

依韻答杜相公寵示之作

一本云伏蒙寵示佳篇以不赴東園之會某亦經春多病誠有

可嗟謹依元韻輒紆鄙素一本於經春多病下又有畧無少暇四字

醉翁豐樂一閒身憔悴今來汴水濱每聽鳥聲知改節因吹柳

絮惜殘春

蓋經春罕見花也

平生未省降詩敵

近數和難韻甚覺牽彊

到處何嘗

訴酒巡州志鉞塵都已盡看花商作飲茶人

依韻和杜相公喜雨之什

歲時豐儉若循環天幸非由

一作因

拙政然一雨雖知為美澤三

登猶未

一作未足

補凶年

京東累歲不熟

桑陰蔽日交垂路麥穗含風秀滿

田千里郊原想如畫正宜攜酒望晴川

謝太傅杜相公寵示嘉篇

凜凜節奇霜澗柏昭昭心瑩玉壺冰正身尚可清風俗當暑何

須厭鬱蒸塵柄屢揮容

一作會

請益龍門雖峻忝先登立朝行已

師資久寧止篇章此服膺

答杜相公寵示去思堂詩

當年丞相倦洪鈞弭節初來潁水濱惟以琴尊樂嘉客能將富

貴比浮雲西溪水色春長綠北渚花光暖

一作老

自薰

去思堂在北渚之北

臨西溪溪晏公所開也得載公詩播人口去思從此四夷聞

答太傅相公見贈長韻

蹤跡本羈單登門二十年平生任愚拙自進恥因緣憂患經多
 矣疲驚尚勉旃凋零鶯谷友修與尹師魯蘇同出門下憔悴鴈池邊忽忽
 良時失區區俗慮闡公齋每偷暇師席屢攻堅善誨常一本無
 倦餘談亦可編每接公論議皆立朝行已之節至於談笑之仰
 高雖莫及希驥豈非賢報國如非願歸耕寧買田期無辱知己
 肯逐利名遷

借觀五老詩次韻為謝

一本注云即丞相杜公太子賓客王洙光祿卿畢世長兵部郎中朱

貫尚書郎馮平

脫遺軒冕就安閒笑傲邱園縱倒冠白髮憂民雖種種丹心許

國尚桓桓鴻冥得路高難慕松老無風韻自寒聞說優游多倡

和新篇何惜盡

一作傳一作看

答杜相公惠詩

一本云近以藥苗茶具為獻伏蒙報以嘉篇云云謹於別韻課成一首

藥苗本是山

一作仙

家味茶具偏於野客宜敢以微誠將薄物少

資清興入新詩言無俗韻精而勁筆有神鋒老更奇二寶收藏

傳百

一作在

世豈惟榮耀詫當時

去思堂手植雙柳今已成陰因而有感

曲闌高柳拂層簷卻憶初栽映碧潭人昔共遊今孰在樹猶如

此我何堪壯心無復身從老世事都銷酒半酣後日更來知有

幾攀條莫惜駐征驂

和陸子履再遊城西李園

京師花木類多奇常恨春歸人不歸車馬喧喧走塵土園林處
處鎖芳菲殘紅已落香猶在羈客多傷涕自揮我亦悠然無事
者約君聯騎訪郊圻

內直對月寄子華舍人持國廷評一作呈原父

禁署一作省沈沈玉漏傳月華雲表溢金盤纖埃不隔光初滿萬

物無聲夜向闌蓮燭燒殘愁夢斷蕙爐薰歇覺衣單水精宮鎖

黃金闕故比人間分外寒

答子華舍人退朝小飲官舍一作和子華朝退寒甚陪諸公飲

玉階朝罷卷晨班官舍相留一笑間與世漸疎嗟已老一作緣老態

得朋為樂偶偷閒紅牋搦管吟紅藥綠酒盈尊舞綠鬢自是風
情年少事多慙白髮與蒼顏

內直晨出便赴奉慈齋宮一作宿馬上口占一本云呈子華子履

凌晨更直九門開驅馬悠悠望禁街霜後樓臺明曉日天寒煙
霧著宮懷山林未去猶貪寵尊酒何時共放懷已覺蕭條悲晚
歲更憐衰病怯清齋

景靈朝謁從駕還宮

琳館清晨藹瑞氛玉旒朝罷奏韶鈞綠槐夾路飛黃蓋翠輦鳴

鞘向一作人紫宸金闕日高猶泣露綵旗風細不驚塵自慙白首

追時彥行近儲胥忝侍臣

憶滁州幽谷

滁南一作豐山幽谷抱千峯高下山花遠近紅當日辛勤皆手植而

今開落任春風主人不覺悲華髮野老猶能說醉翁誰與援琴

親寫取夜泉聲在翠微中

和韓學士襄州聞喜亭置酒

一作和欽聖學士聞喜置酒即事

巖薛高城漢水邊登臨誰與共躋攀清川萬古流不盡白鳥雙

飛意自閒可笑沈碑憂岸谷誰能把酒對江山少年我亦曾遊

目風物今思一夢還

寄題梅龍圖滑州溪園

一作西溪

聞說溪園景漸佳遙知清興已無涯飲闌歸騎多一作去乘月雪

後尋春自探花百轉黃鸝消永日雙飛白鳥避鳴笳平生喜接

君酬一作嗟子唱不得尊前詠落霞

奉使道中五言長韻

初旭一作日瑞霞烘都門祖帳供親持使者節曉出大明宮城闕

青煙起樓臺白霧中繡鞵一作鞍驕躍躍貂袖紫蒙蒙朔野驚颺

慘邊城畫角雄過橋分一水回首羨南鴻地里山川隔天文日

月同兒童能走馬婦女亦腰弓度險行愁失盤高路欲窮一作絕

誇天險高盤畏路窮山深聞喚鹿林黑自生成一作成風松壑寒逾響冰溪

流咽復通望平愁驛迥野曠覺天穹駿足來山北輕禽出海東

合圍飛走盡移帳水泉空講信鄰方睦尊賢禮亦隆一作研冰

燒酒赤凍一作斫膾縷霜紅白草經春在黃沙盡日濛新年風漸

變歸路雪初融祇事須彊力嗟予乃病翁深慙漢蘇武歸國不

論功

奉使契丹初至雄州一作過塞

古關衰柳聚寒鴟駐馬城頭日欲斜一作駐馬關頭見落霞猶去西樓二

千里行人到此莫思家

奉使契丹回出上京馬上作

紫貂裘暖朔風驚潢水冰光射日明笑語同來向公子馬頭今

日向南行

送渭州王龍圖

漢軍一作兵十萬控山河玉帳優游暇日多夷狄從來懷信義廟

堂今不用干戈吟餘畫角吹殘月醉裏紅燈炫綺羅此樂直須

年少壯嗟余心志已蹉跎

李畱後家聞箏坐上作

余少時嘗聞一釣容老樂工箏聲與時人所彈絕異云是前朝教坊舊聲其後不復聞至此始復一聞也

不聽哀箏二十年忽逢纖指弄鳴絃絳蠻巧囀花間舌嗚咽交

流冰下泉嘗謂此聲今已絕問渠從小自誰傳尊前笑我聞彈

罷白髮蕭然涕泣然

送鄆州李畱後

北州遺頌藹嘉聲東土還聞政有成組甲光寒圍夜帳綵旗風

暖看春耕金釵墜鬢分行立玉塵高談四坐傾富貴常情誰不羨愛君風韻有餘清

子華學士傑直未滿遽出館伴病夫遂當輪宿輒成拙句

奉呈

萬釘寶帶爛腰環賜一作錫宴新陪一笑歡金馬並遊年最少玉

堂初直夜猶寒自嗟零一作流落凋顏鬢晚得飛翔接羽翰今日

遽聞催遞宿不容多病養衰殘

禮部貢院閱進士就試自此而下二十首皆禮部貢院唱和一本云凡二十二首蓋二首見

外集

紫案焚香暖吹輕廣庭清曉席羣英無譁戰士銜枚勇下筆春

蠶食葉聲鄉里獻賢先德行朝廷列爵待公卿自慙衰病心神

耗賴有羣公鑒裁一作擇又作識精

和梅聖俞元夕登東樓

遊豫恩同萬國懽新年佳節候初還華燈爍爍春風裏黃傘亭

亭瑞霧間可愛清光澄夜色遙知喜氣動天顏自憐曾預一作與

稱觴列獨宿冰廳夢帝關

再和

禁城車馬夜喧喧閒繞危闌一作樓去復還遙望觚稜煙靄外似

聞天樂夢魂間豈無尊酒當佳節况有朋歡慰病顏待得歸時

花在否春禽簷際已關關

又和

憑高寓目偶乘閒，袷服遊人見往還。明月正臨雙闕上，行歌遙

聽九衢間。黃金絡一作束馬追朱憶，紅燭籠紗照玉顏。與世漸一作已

疎嗟老矣佳辰樂，事豈相關

憶鶴呈公儀一作和公儀憶鶴

一笑相驩一作從樂得朋誦君雙鶴句，尤清高懷自喜凌雲格。俗

耳誰思警露聲，所好與時雖異趣。累心於物豈非情，歸休約我

攜琴去，共看婆娑舞月明。

答王禹玉見贈一作和禹玉書事

昔時叨入武成宮，曾看揮毫氣吐虹。夢寐閒思十年舊一作事笑

談今此一尊同喜，君新賜黃金帶，顧我宜為白髮翁。自古薦賢

為報國，幸依精識士稱公。

答王內翰范舍人一本云敘懷謝景仁禹玉

相從一笑歡無厭，屢獲新篇喜可涯。自昔居前誚糠粃，幸容相

倚媿蒹葭白麻詔，令追三代本注禹玉年前方入翰林青史文章自一家

一本注景仁修撰交同書局我亦諫垣新忝命，君恩未報髮先華禹玉新除學士景仁

新兼修撰

戲答聖俞持燭之句

辱君贈我言雖厚，聽我酬君意不同。病眼自憎紅蠟燭，何人肯

伴白鬚翁。花時浪過如春夢，酒敵先甘伏下風。惟有吟哦殊不

倦始知文字樂無窮

小桃一作和公儀正月桃

雪裏花開人未知
摘來相顧共驚疑
便當索酒花前醉
初見今年第一枝

戲書

支離多病歎衰顏
賴得一作羣居一笑歡人老
思家甚年少身閒

泥酒過春寒來時御柳一作水天街凍歸去
梨花禁禦殘縱使

開門佳節晚未妨
雙鶴舞霜翰一作朝鎖漢臺空悵望欲將春恨託飛翰

春雪一本上有和聖俞字

逗曉一作戶風聲惡
寒簾雪勢斜
應憐未歸客
故勒欲開花
病思

寒添睡春愁夢在家
誰能慰寂寞惟有酒如霞

和梅公儀嘗茶

溪山擊鼓助雷驚
逗曉靈芽發翠莖
摘處兩旗香可愛
貢來雙鳳品尤精
寒侵病骨惟思睡
花落春愁未解醒
喜共紫甌吟且酌
羨君蕭灑有餘清

和較藝書事一作奉答禹玉再示之作

相隨懷詔下天闈
一鎖南宮隔幾旬
玉塵清談消永日
金尊美酒惜餘春
杯盤飭粥春風冷
池館榆錢夜雨新
猶是人間好時節
歸休過我莫辭頻

和一作戲答公儀贈白一本無鵬白字

梅公憐我髭如雪贈以雙禽一作鸚鵡意有云但見尋常思白兔便

疑不解醉紅裙吟齋雖喜留閒客野性寧忘在嶺雲我有銅臺

方尺瓦慙非玉案欲酬君

再和用其韻一作依韻

佳翫能令百事忘豈惟閒伴倒餘缸珍奇來自海千里皎潔明

如璧一雙日暖朝籠青石砌春寒夜宿碧紗窗蠻煙瘴霧雖生

處何必區區憶陋邦

和聖俞春雨

簷瓦蕭蕭雨勢疎寂寥官舍與君俱身遭鎖閉如鸚鵡病識陰

晴似鵝鵠年少自愁花爛漫春寒偏著老肌膚莫嫌來往傳詩

句不爾須當泥酒壺

出省有日書事

凌晨小雨壓塵輕閒憶登高望禁城樹色連雲春泱泱風光著

草日晴明看榆吐莢驚將落見鵲移巢忽已成誰向兒童報歸

日為翁寒食少一作且留錫

和一本有較藝將畢

槐柳來時綠未勻開門節物一番新踏青寒食追遊騎賜火清

明忝侍臣拂面蜘蛛占喜事入簾蝴蝶報家人在李賀詩莫嗔年少

思歸切白髮衰翁尚惜春

喜定號和禹玉內翰用其韻一作和禹玉喜定號

衡鑒慙叨選英豪此所鍾古今參雅鄭善惡雜臯共揮翰飄飄

思懷奇落落胸披文驚可畏奏下始開封但喜真才得寧一作何

虞橫議攻欲知儒學盛首善本三靡

和出省國朝之制禮部考定卷子奏上字號差臺官一人拆封出榜一作和公儀上馬有作

僮奴一作奴襍被莫相催待報霜臺御史來晴陌便當聯騎去春

風任放百花開文章紙貴爭一作看馳譽朝野人言慶得才共向

丹墀待一作待臨選莫驚鱗鬣化風雷

居士集卷第十二終

居士集卷第十三 全集十三

二十七世孫衡校刊

律詩五十五首

送鄭革先輩賜第南歸一本注革以累舉年老恩賜出身

少年鄉譽歎才淹六十猶隨貢士函握手親朋驚白髮還家間

里看青衫閣涵空翠連衡阜門枕寒江落楚帆試問塵埃勤斗

祿何如琴酒老雲巖

和原父揚州六六一題作五題

時會堂二首造貢茶所也

積雪猶封蒙頂樹驚雷未發建溪春中州地暖萌芽早入貢宜

先百物新

憶昔嘗修守臣職

余嘗守揚州歲貢新茶

先春自探兩旗開誰知白首來

辭禁得與金鑾賜一杯

自東門泛舟至竹西亭登崑邱入蒙谷戲題春貢亭

崑邱蒙谷接新亭畫舸悠悠春水生欲覓揚州舊處但隨風

際管絃聲

竹西亭

十里樓臺歌吹繁揚州無復似當年古來興廢皆如此徒使登

臨一慨然

崑邱臺

訪古高臺半已傾春郊誰

一作

從綵旗行喜聞車馬人同樂慣

聽笙歌鳥不驚

蒙谷

一徑崎嶇入谷中翠條紅刺背春叢花深時有人相應竹密初

疑路不通

內直奉寄聖俞博士

千門鑰

一作鎖

入斷人聲樓閣

一本作闕

沈沈夜氣生獨直偏知宮漏

永稍寒尤

一作猶

覺玉堂清霜雲映

月鱗鱗色風葉飛空撼撼鳴

犬馬力疲恩未報坐驚時節已崢嶸

送梅龍圖公儀知杭州

萬室東南富且

一作號富

繁羨君風力有餘閒漁樵人樂江湖外一作

上談笑詩成尊俎間日暖梨花催美酒天寒桂子落空山郵筒

不絕如飛翼

一作雖然不

莫惜新篇屢往還

一作應有新篇慰病顏

送沈學士康知常州

舊館芸香鎖寂寥齋船東下入秋濤江晴風暖旌旗颯木落霜
清鼓角高吟就綵牋賓已醉舞翻紅袖飲方豪平生麤得為州
樂因羨君行首重搔

聖俞在南省監印進士試卷有兀然獨坐之歎因思去歲

同在禮闈慨然有感兼簡子華景仁

南宮官舍苦蕭條常憶羣居接儁寮古屋醉吟鐙豔豔畫廊愁

聽雨蕭蕭殘春共約無虛擲一歲那知忽復銷顧我心情又非

昨祇思相伴老漁樵

奉答聖俞歲日書事

積雪照清晨東風冷著人年光向

一作隨

老速物意逐時新貰酒

閒邀客披裘共

一作自

探春猶能自

一作畧

勉彊顧我莫辭頻

夜聞春風有感奉寄同院子華紫微長文景仁

閨後春深雪始銷東風凌鏢勢方豪陽生草木黃泉動冰破江

湖白浪高未報國恩嗟病骨可憐身事一漁舸少年自與芳菲

競莫笑衰翁擁弊袍

病告中懷子華原父

狂來有意與春爭老去心情漸不能世味惟存詩淡泊生涯半
為病侵陵花明曉日繁如錦酒撥浮醅綠似澠自是少年豪橫
過而今癡鈍若寒蠅

奉酬長文舍人出城見示之句

春分臘雪未全銷凜冽春寒氣尚驕攝事初欣迎社燕尋芳因
得過溪橋清浮酒蟻醅初撥暖入鶯篁舌漸調興味愛君年尚
少莫嫌齋禁一作齋館暫無膠

唐崇徽公主手痕和韓內翰

故鄉飛鳥尚啁啾何況悲笳出塞愁青塚埋魂知不返翠崖遺
迹為誰畱玉顏自古為身累肉食何人與國謀行路至今空歎

息巖花澗草自春秋

答和閣老劉舍人雨中見寄

花間鳥語愁泥滑屋上鳩鳴厭雨多坐見殘一作芳春一如此可

憐吾意已蹉跎蕭條兩鬢霜後草激灑十分金卷荷此物猶能

慰衰老一作病稍晴相約屢相過

寄閣老劉舍人

夢寐江西未得歸誰憐蕭颯鬢毛衰莓苔生壁圖書室風雨閉
門桃李時得酒雖能陪笑語老年其實厭追隨明朝雨止花應
在又踏春泥向鳳池

詳定幕次呈同舍

嘉祐四年御試進士時詳定卷子幕次在崇政殿後

來時宮柳綠初勻坐見紅芳幾番新蜂蜜滿房花結子還家何處覓殘春

禁中見鞞紅牡丹洛中花之奇者也

盛遊西洛方年少晚落南譙號醉翁白首歸來玉堂署一作君

王殿後見鞞紅

和江鄰幾學士桃花用其韻時在崇政殿後詳定幕次

草上紅多枝上稀芳條一作綠萼憶來時見桃著子始歸後誰

道仙花開落遲

送襄陵令李君

綠髮襄陵新長官面顏雖老渥如丹君服何首烏鬚髮皆黑顏容如少時折腰聊

為五斗屈把酒猶能一笑歡紅棗林繁欣歲熟紫檀皮軟禦春

寒民淳政簡居多樂無苦思歸欲掛冠

景靈宮致齋

攝事衰年力不彊誰憐岑寂臥齋坊一作房青苔點點無人迹綠

葉陰陰覆砌涼玉宇清風來處遠仙家白日靜中長卻視九衢

車馬客自然顏鬢易蒼蒼

夏享太廟攝事齋宮聞鶯寄原甫

四月田家麥穗稠桑枝生椹烏啁啾鳳城綠樹知多少何處飛

來黃栗畱田家謂麥熟時鳴者為黃栗畱出詩義

送王平甫安國下第

歸袂搖搖心浩然曉船鳴鼓轉風灘朝廷失士有司恥貧賤不
憂君子難執手聊須爲醉一作酒別還家何以慰親懽自慙知子

未一作能薦白首胡爲侍從官

對雪十韻

對雪無佳句端居正杜門人閒見初一作初見落風定不勝繁可喜

輕明質都無翦刻痕鋪平失池沼飄急響窗軒惜不搖嘉樹衝

宜走畫轅寒欺白酒嫩一作老愛紫貂溫遠靄銷如洗愁雲晚

更屯兒吟鸚鳳語翁坐凍鴟蹲病思驚殘歲朋歡賴酒一作尊

稍晴春意動誰與探名園

和武平學士歲晚禁直書懷五言二十韻用其韻

多病淹殘歲初寒臥直廬朝廷務清靜鈴索少文書嚮學今爲

盛優賢古莫如靚深嚴禁署一作闕閒宴樂羣居賜馬聯金絡清

塵侍玉輿討論三代盛獻納萬機餘號令存寬大文章復古初

笑談揮翰墨俄頃列瓊琚夜漏銷官燭春暉上玉除歌詩唐李

杜言語漢嚴徐自顧追時彥多慙不鄙予無鹽煩刻畫寒谷借

吹噓朋友飛離鷺君臣在藻魚會榮同衛鶴取笑類黔驢皎皎

心雖在蕭蕭髮已疎未知論報効安得遂樵漁雲破西山出江

橫畫閣虛餘生歎勞止搔首念歸與引綬誇民吏椎牛會里閭

一麾終得請此計豈躊躇

答西京王尚書寄牡丹

新花來遠喜開封呼酒看花興未窮年少曾爲洛陽客眼明重
見魏家紅卻思初赴青油幕自笑今爲白髮翁西望無由陪勝
賞但吟佳句想芳叢

應制賞花釣魚

絳闕晨霞一作光照霧開輕塵不動翠華來魚遊碧沼涵靈德花
馥清香薦壽杯夢聽鈞天聲杳默日長化國景徘徊自慙擊壤
音多野帝所賡歌亦許陪

清明賜新火

魚鑰侵晨放九門天街一騎走紅塵桐華應候催佳節榆火推
恩忝侍臣多病正愁飭粥冷清香但愛蠟煙新自憐慣識金蓮

燭翰苑曾經七見春

明堂慶成

辰火天文次臯門路寢闕奉親昭孝德惟帝饗精誠禮以三年
講時因萬物成九筵嚴太室六變導和聲象魏中天起風雷大
號行歡呼響山岳流澤浹根莖寶墨飛雲動金文耀日晶從臣
才力薄無以頌休明

羣玉殿賜宴

一本作謝上賜飛白書

至治臻無事豐年樂有成圖書開秘府宴飫一作飲集羣英論道

皇墳奧貽謀一作謨寶訓明九重多暇豫八體極研精筆力千鈞

勁毫端萬象生飛牋金灑落拜賜玉鏘鳴盛際崇儒學愚臣濫

寵榮惟能同舞獸聞樂識和聲

永昭陵挽詞三首

仁宗

與子雖天意知人昔帝難一言謀早定九鼎勢先安大舜仁由性成湯治以寬孤臣恩未報清血但洸瀾

干戈不用臻無事朝野多歡樂有年便坐看揮飛白筆侍臣新和柏梁篇衣冠忽見藏原廟

一作

鼓愁聞向洛川寂寞秋風

羣玉殿還同恍惚夢鈞天

行殿沈沈畫翼重淒涼挽鐸出深宮攀號不悟龍胡遠侍從猶穿豹尾中日薄山川長起霧天寒松柏自生風斯民四十年涵煦耕鑿安知荷帝功

續作永昭陵挽詞五首

王者居尊本無外由來天下以爲家六龍白日乘雲去何用金錢買道車

苦霧霏霏著彩旗猶排吉仗雜凶儀常時鳳輦行遊處今日龍輻慟哭隨

都人擾擾塞康莊西送靈車過苑墻金鼎藥成龍已去人間惟有鼠拖腸

素幕悠悠逗曉風行隨哀挽出深宮妃嬪莫向蒼梧望雲覆昭陵洛水東

叨陪法從最多年慣聽梨園奏管絃從此無聞瞻黼坐惟應魂

夢到鈞天

赴集禧宮祈雪追憶從先皇駕幸泣然有感

琳闕岌岌倚瑞煙憶陪遊豫入新年雲深曉日開宮殿水濶春風颺管絃千騎清塵回輦路萬家明月放鐙天一朝人事淒涼改惟有靈光獨巋然

夜宿中書東閣

翰林平日接羣公文酒相歡慰病翁白首歸田徒墨蹟作空有約黃扉論道愧無功攀髯路斷三山遠憂國心危百箭攻今夜靜聽丹禁漏尚疑身在玉堂中

送王學士赴兩浙轉運

京本作送王勝之兩浙運使

漢家財利析秋毫暫屈清才豈足勞邑屋連雲盈萬井舳艫銜尾列千艘春寒欲盡黃梅雨海浪高翻白鷺濤平昔壯心今在否江山猶得助詩豪

早朝

閭闔初開瑞霧中丹霞曉日上蒼龍鳴鞭響徹廊千步佩玉聲趨戟百重雪後朝寒猶凜冽柳梢春意已丰茸少年自結芳菲侶老病惟添睡思濃

下直

宮柳街槐綠未齊春陰不解宿雲低輕寒漠漠侵馳謁小雨班班作燕泥報國無功嗟已老歸田有約一作計一何稽終當自駕

柴車去獨結茅廬潁水西

齋宮尚有殘雪思作學士時攝事於此嘗有聞鶯詩寄原父因而有感四首

雪壓枯條脈未抽春寒慄慄作春愁卻思綠葉清陰下來此曾聞黃栗畱

老來何與青春事閒處方知白日長自恨乞身今未得齒牙浮動鬢蒼浪

兩京平日接英髦不獨詩豪酒亦豪休把青銅照雙鬢君謨今已白刁騷

詩篇自覺隨年老酒力猶能助氣豪興味不衰惟此爾其餘萬

事一牛毛

攝事齋宮偶書

一作齋夕感事

齋宮岑寂偶偷閒猶覺閒中興未闌美酒清香銷晝景冷風殘雪作春寒丹心未死惟憂國白髮盈簪盍掛冠誰爲寄聲潁潁客此生終不負漁竿

早朝感事

疎星牢落曉光微殘月蒼龍闕角西玉勒爭門隨仗入牙牌當殿報班齊羽儀雖接鴛兼鷺野性終存鹿與麋笑殺汝陰常處

士墨蹟作雲十年騎馬聽朝音鷄

林高臥客

集禧謝雨

十里長街五鼓催泥深雨急馬行遲臥聽竹屋蕭蕭響卻憶淞州睡足時

下直呈同行三公

午漏聲初轉歸鞍路偶同天清黃道日街濶綠槐風萬國舟車會中天象魏雄戢戈清四海論道屬三公自愧陪羣彥從來但樸忠時平容竊祿歲晚歎衰翁買地淮山北垂竿潁水東稻梁雖可戀吾志在冥鴻

東閣雨中

直閣時偷暇幽懷坐獨哦綠苔人迹少黃葉雨聲多雲結愁陰重風傳禁漏過瑤圖新嗣聖玉塞久包戈相府文書簡豐年氣

候和還將鳳池句聊雜野人歌

四月十七日景靈宮奉迎仁宗皇帝御容有感


行殿峩峩出綠槐琳房芝闕聳

一作竦

崔嵬管絃飄落人間去幘

節疑從天上來基業百年傳聖子黔黎四紀樂春臺孤臣不得同鍼虎未死心先冷若灰

居士集卷第十三終



居士集卷第十四 全集十四

二十七世孫衡校刊

律詩六十五首

馬上默誦聖俞詩有感一作題

興來筆力千鈞勁一作重酒醒一作醉後人間萬事空蘇梅二子今亡

矣索寞滁山一醉一作除陽一病翁

定力院七葉木

伊洛多佳木娑羅舊得名常於佛家見宜在月宮生卸砌陰鋪

靜虛堂子落聲夜風疑雨過朝露炫霞明車馬王都盛樓臺梵

宇闕惟應靜者樂時聽野禽鳴

秋陰

秋陰積不散夜氣凜初清雨冷侵燈暈風愁送葉聲國恩慙未報歲晚念餘生卻憶滁州睡村醪自解醒

秋懷

節物豈不好秋懷何黯然西風酒旗市細雨菊花天感事悲雙鬢包羞一作貪榮食萬錢鹿車終自駕歸去潁東田

初寒

多病淹殘歲初寒悄獨吟雲容乍濃淡秋色半晴陰籬菊催佳節山泉響夜琴自能知此樂何必戀腰金

寄渭州王仲儀龍圖

一作送王素之渭州

羨君三作臨邊守慣聽胡笳不慘然弓勁秋風鳴白角帳寒春雪壓青氊威行四境烽煙斷響入千山號令傳翠幙紅燈照羅綺心情何似十年前

崇政殿試賢良晚歸

槐柳依依禁籞長初寒人意自淒涼鳳城斜日留殘照玉闕浮雲結夜霜老負漁竿貪國寵病須尊酒送年光歸來解帶西風冷衣袖猶霑玉案香

聞潁州通判國博與知郡學士唱和頗多因以奉寄知郡

陸經通判楊褒

一自蘇梅閉九泉始聞東潁播新篇金尊畱客史一作君醉玉使

國朝文忠公全集 卷十四
塵高談別乘賢十里秋風紅菌菴一溪春水碧漪漣政成事簡
何爲樂終日吟哦雜管絃

南郊慶成

祀教民昭孝天惟德是親太宮嚴大饗吉土兆精禋禮樂三王
盛梯航萬國賓恩霑羣動洽慶典一陽新奉冊尊長樂均釐及
眾臣不須雲物瑞和氣淡人神

和昭文相公上巳宴

一雨初消九陌塵秉蘭修禊及芳辰恩深始錫龍池宴節正須

一作

知鳳歷新

是歲始頒明天新
曆三月三日丁巳

紅琥珀傳盃潋灩碧琉璃瑩

水齋淪上林未放花齊發留待鳴鞘出紫宸

三日赴宴口占

賜飲初逢禊節佳昆池新漲碧無涯九門寒食多遊騎三月春
陰正養花共喜流觴修故事自憐雙鬢惜年華鳳城殘照歸鞍
晚禁籟無風柳自斜

讀楊蟠章安

一本有
詩字集

蘇梅久作黃泉客我亦今爲白髮翁臥讀楊蟠一千首乞渠秋
月與春風

蘇主簿洵挽歌

布衣馳譽入京都丹旆俄驚

一作
聞

反舊間諸老誰能先賈誼君

王猶未識相如三年弟子行喪禮千兩鄉人會葬車我獨

一作
獨我

空齋掛塵榻遺編時閱子雲書

寄題沙溪寶錫

碑本作積院

為愛江西物物佳作詩嘗向北人誇青林霜日換

一作楓葉白

水秋風吹稻花釀酒烹雞留醉客鳴機織

墨蹟作緝

芋徧山家野僧

獨得無生樂終日焚香坐結跏

宋司空

一作元憲公

挽辭

文章天下無雙譽伯仲人間第一流出入兩朝推舊德周旋三

事著嘉謀從容進退身名泰寵錫哀

一作衰

榮禮數優棠棣從來

敦友愛九原相望接松楸

感事

治平丁未正月二十有六日

故園三徑久成荒賢路胡為此坐妨病骨瘦便花藥暖

嘉祐八年于闕

國王遣使來朝貢恩賜宰臣已下于闕所獻花藥布柔朋潔白如凝脂而禦風甚溫不減馳褐也

煩心渴喜鳳

團香

先朝舊例兩府輔臣歲賜龍茶一斤而已余在仁宗朝作學士兼史館修撰嘗以史院無國史乞降一本以備檢討

遂命天章閣錄本付院仁宗因幸天章見書吏方錄國史思余

上言亟命賜黃封酒一瓶果子一合鳳團茶一斤押賜中使語

余云上以學士校新寫國史不易遂有此賜然號弓但灑孤臣

血憂國空餘兩鬢霜何日君恩憫衰朽許從初服返耕桑

大行皇帝靈駕發引挽歌辭三首

享國年雖近斯民澤已深儉勤成禹聖仁孝本虞心方慶逢千

載俄驚遏八音天愁嵩嶺外雲慘洛川溥仗動千官衛神行萬

象陰孤臣恩未報清血但盈襟

次易水歌八首集卷一四居士集

文景孜孜儉與恭慨然思就太平功興隆學校皇家盛放斥嬪
嬙永巷空威懾一作攝黠羌方問罪丹成仙鼎忽遺弓霜清日薄

簫笳咽萬國悲號慘澹中

千齡應運協天人四海方欣政日新忽見九門陳羽衛猶疑五
載欲時巡觚稜月暗翔金鳳輦道霜清臥石麟白首舊臣瞻畫
翠秋風淚灑屬車塵

奉答子履學士見贈之作

誰言潁水似瀟湘一笑相逢樂未央歲晚君尤耐霜雪興闌吾
欲返耕桑銅槽旋壓清尊美玉塵閒揮白日長豫約詩一作書筒
屢來往兩州雞犬接封疆

送道州張職方

桂籍青衫憶共遊憐君華髮始為州身行南鴈不到處山與北
人相對愁莫為高才輕遠俗當令遺老識賢侯三年解組來歸
日吾已先耕潁水頭

再至汝陰三絕

黃栗畱鳴桑椹美紫櫻桃熟麥風涼朱輪昔愧無遺愛白首重
來似故鄉

十載榮華貪國寵一生憂患損天真潁人莫怪歸來晚新向君
前乞得身

水味甘於大明井魚肥恰似新開湖十四五年勞夢寐此時才

得少踟躕

余時將赴亳社恩許枉道過潁也

郡齋書事寄子履

使君居處似山中
吏散焚香一室空
雨過紫苔惟鳥迹
夜涼蒼檜起天風
白醪酒嫩迎秋熟
紅棗林繁喜歲豐
寄語瀛洲未歸客
醉翁今已作仙翁

答子履學士見寄

潁亭相望樂未央
吾州仍得治仙鄉
夢回枕上黃梁熟
身在壺中白日長
每恨老年才已盡
怕逢時敵力難當
知君欲別西湖去
乞我橋南菡萏香

寄棗人行書贈子履學士

秋來紅棗壓枝繁
堆向君家白玉盤
甘辛楚國赤萍實
磊落韓嫣黃金丸
聊效詩人投木李
敢期佳句報琅玕
嗟予久苦相如渴
卻憶冰梨熨齒寒

贈隱者

五岳嵩當天地中
聞君仍在最高峯
山藏六月陰崖雪
潭養千年蛻骨龍
物外自應多至樂
人間何事忽相逢
飲罷飄然不辭決
孤雲飛去杳無蹤

戲書示黎教授

古郡誰云亳陋邦
我來仍值歲豐穰
烏銜棗實園林熟

一本蜂作密

採檜花村落香
世治人方安壠畝
興闡吾欲反耕桑
若無潁水

肥魚蟹終老仙鄉作醉鄉

書懷

一作思穎
寄常處士

齒牙零落鬢毛疎，潁水多年已結廬。解組便為閒處士，新花莫

笑病尚書。青衫仕至千鍾祿，白首歸乘一鹿車。况一作幸有西鄰

隱君子，輕裘短

一作披
裘帶

笠伴春鋤

常夷
浦也

過河龍潭

碧潭風定影涵虛，神物中藏岸不枯。一夜四郊春雨足，卻來閒

臥養明珠

遊太清宫出城馬上口占

擁旆西城一據鞍，耕夫初識勸農官。鷓鴣日出林光動，野濶風

搖麥浪寒。漸暖綠楊纔弄色，得晴丹杏不勝繁。牛羊雞犬田家

樂，終日思歸盍掛冠

太清宫燒香

清晨琳闕聳巒岼，弭節齋坊暫整冠。玉案拜時香裊裊，畫廊行

處珮珊珊。壇場夜雨蒼苔古，樓殿春風碧瓦寒。我是蓬萊宮學

士，朝真便合列仙官

謝提刑張郎中寄筇竹拄杖

玉光瑩潤錦爛斑，霜雪經多節愈堅。珍重故人相贈意，扶持衰

病過殘年

七言二首答黎教授

撥囊浮醅新釀熟得霜寒菊始開齊養丹道士顏如玉愛酒山
公醉似泥不惜藥從蜂採去尚餘香有蝶來棲莫嫌學舍官閒
冷猶得芳尊此共攜

共坐闌邊日欲斜更將金蕊泛流霞欲知卻老延齡藥百草枯
時始見花

又寄許道人

綠髮方一作青瞳瘦骨輕飄然乘鶴去吹笙郡齋獨坐風生竹疑
是孫登長嘯聲

扶溝知縣周職方錄示白鶴宮蘇才翁子美贈黃道士詩
并盛作三絕見索拙句輒爲四韻奉酬

能棋好飲一道士醉墨狂吟二謫仙道士不聞乘白鶴謫仙今
已拚黃泉古來豪傑皆如此誰拂塵埃爲惘然華髮郎官才調
美更將新句續遺篇

曉發齊州道中二首

東州幾日倦征軒千騎驂驪白草原鴈入寒雲驚曉角雞鳴蒼
滄一作滄海浴朝暎國恩未報身先老客思無慘一作聊歲已昏誰得

平時爲郡樂自憐痛渴馬文園

歲晚勞征役

一作晚歲
倦征軒

三齊舊宮閒人行桑下路日上一作海

邊山軒冕非吾志風霜犯客顏惟應思穎夢先過穆陵關

表海亭

望海亭亭古堞間，獨憑危檻俯人寰。苦寒冰合分

一作流水

北洋河也。一在州中。一在城外。

欲雪雲垂四面山。

州城四面皆山。東西二面山差遠。唯此亭高。盡見之。

肉已消嗟病骨凍，醪猶可慰愁顏。潁田二頃春蕪沒，安得柴車自駕還。

歲晚書事

一麾新命古三齊，白首滄洲願已違。軒冕從來為外物，山川信美獨思歸。長天極目無飛鳥，積雪生光射落暉。臘候已窮春欲動，勸耕猶得覽郊圻。

謁廟馬上有感

旌旆曉悠悠，行驚歲已遒。霜雲依日薄，野水帶冰流。富庶齊三

服，山川禹九州。自憐思潁意，無異旅人愁。

毬場看山

為愛南山紫翠峯，偶來仍值雪初融。自嫌前引朱衣吏，不稱閒行白髮翁。向老光陰雙轉轂，此身天地一飄蓬。何時粗報君恩了，去逐冥冥物外鴻。

殘臘

一作雪

殘雪初銷

融一作

上古臺桑郊向日，綵旗開山橫南陌。城中見春

逐東風，海上來老去。每驚新歲換，病多能使壯心摧。自嗟空有東陽瘦，覽物慙無八詠才。

歲暮書事

東州負海圻風物老依依歲熟鷓鴣聲樂天寒鴈過稀跨鞍驚髀骨數帶減腰圍卻羨常夫子終年獨掩扉

聞沂州盧侍郎致仕有感

少年相與探花開老病惟愁節物催蹉跎歸計荒三徑牢落生涯酌一杯穎上先生招不起沂州太守亦歸來自媿國恩終莫報尚貪榮祿此徘徊

春晴書事

莫笑青州太守頑三齊人物舊安閒晴明風日家家柳高下樓臺處處山嘉客但當傾美酒青春終不換頽顏惟慙未報君恩了昨日盧公衣錦還

遊石子澗

富相公創亭

截薛高亭古澗隈偶攜嘉客共

一作此

徘徊席間風起聞天籟

後山光入酒杯

一作朝廷元老今華袞巖壁遺文已綠苔

泉落斷崖春壑響花藏深

崦過春開

一作新雨亂泉逢石響過春深谷尚花開

一作磨廡

禽鳥莫驚顧太守不

將車騎來

讀易

莫嫌白髮擁朱輪恩許東州養病臣飲酒橫琴銷永日焚香讀易過殘春昔賢軒冕如遺屣世路風波偶脫身寄語西家隱君子奈何名姓已驚人

水磨亭子

多病山齋厭鬱蒸，經時久不到東城。
新荷出水雙飛鷺，喬木成陰百轉鶯。
載酒未妨佳客醉，憑高仍見老農耕。
使君自有林泉趣，不用絲篁亂水聲。

寄題相州榮歸堂

一本此篇已下係酬答安陽韓侍中五詠

白首三朝社稷臣，壺漿夾道擁如雲。
金貂爭看真丞相，竹馬猶迎舊使君。
豈止軒裳誇故里，已將鐘鼎勒元勳。
不須授簡尊前客，好學平津自有文。

書錦堂

昔憩甘棠長舊圍，重來城郭歎人非。
隨車仍是爲霖雨，被袞何如衣錦歸。

公前出自西樞以武康之節鎮相臺今罷鈞軸以司徒侍中再鎮

觀魚軒

當年下澤驅羸馬，今見犀兵擁碧油。
位望愈隆心愈靜，每來臨水翫游鯈。

狎鷗亭

險夷一節如金石，勲德俱高映古今。
豈止忘機鷗鳥信，陶鈞萬物本無心。

休逸臺

清談終日對清尊，不似崇高富貴身。
已有山川資勝賞，更將風月醉嘉賓。

青州書事

年豐千里無夜警吏一作公退一室焚清香青春固非老者事白

日自為閒人長祿厚豈惟慙飽食俸餘仍足一作得買輕裝君恩

天地不違物歸去行歌潁水傍

畱題南樓二絕本前一首 題作偶書

偷得青州歲閒四時一作案頭終日面孱顏須知我是愛山者無

一詩中不說山

醉翁到處不曾醒問向青州作麼生公退畱賓誇酒美睡餘欹

枕看山橫

答和王宣徽一作答王宣徽見贈

相逢莫怪我幡然出處參差四紀間有道方令萬物遂無能擬

乞一身閒花前獨酌尊前月淮上扁舟枕上山此樂想公應未

暇且持金盞醉紅顏

答和呂侍讀

昔日題輿媿屈賢今來還見擁朱轡笑談二紀思如昨名望三

朝老更尊野徑冷香黃菊秀平湖斜照白鷗翻此中自有忘言

趣病客猶堪奉一樽

奉答子履學士見寄之作

憶昨初為毫守行暫休車騎汝陰城喜君再共尊俎樂憐我久

懷邱壑情累牘已嘗陳素志新春應許遂歸耕老年雖不堪東

作猶得酣歌詠太平

謝景平挽詞


憶見奇童髧兩髦
遽驚名譽眾推高
東山子弟家風在
西漢文章筆力豪
方看凌雲馳駉驥
已嗟埋玉向蓬蒿
追思陽夏曾遊處
撫事傷心涕滿袍

答資政邵諫議見寄二首

豪橫當年氣吐虹
蕭條晚節鬢如蓬
欲知潁水新居士
卽是滁山舊醉翁
所樂藩籬追尺_斤
一作鷓敢言寥廓逐冥鴻
期公歸輔巖廊上
顧我無忘畎畝中

欲知歸計久遷延
三十篇詩二十年
受寵不思身報効
乞骸惟冀上哀憐
相如舊苦中瘠渴
陶令猶能一醉眠
材薄力殫難勉

強豈同高士愛林泉



居士集卷第十四終

